

79155/1141.2(8)

CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY  
APR 15 1952

08

Made in Japan

居易錄卷三十

濟南 王士禛



浯溪新志言黃山谷題魯公磨崖碑詩凡一百八十  
餘字刻中興頌之右順治中永州府推官某過而賦  
詩屬祁陽令刻之石令婚推官輒鐫去山谷書一角  
刻焉千古名蹟一旦刳缺志載之災異宜矣

朱文憲公濂集有題長白山居圖詩云滿地雲林稱  
隱居燕泥汚我讀殘書五更風急鳥聲散時有隔花  
來賣魚子撰長白山錄未及載入因錄于此然不知  
爲何人作也

三月初六日 東宮會講于文華後殿詹事府詹事尹泰侍讀學士李鎧講中庸道也者不可須臾離也一節左春坊庶子常在左春坊諭德楊大鶴講尚書臯陶謨慎厥身修思永一句

新定創參之例創參人親王一百四十名人參七十七斤世子一百二十名人參六十斤郡王一百名人參五十斤長子九十名人參四十五斤貝勒八十名人

參四十斤貝子六十名人參三十斤鎮國公四十五名人參二十二斤半輔國公三十五名人參十七斤半護國將軍二十五名人參十二斤半輔國將軍二十名人參十斤奉國將軍十八名人參九斤奉恩將軍十五名人參七斤半准免關稅餘參每斤納稅六錢其出關買參之人准予盛京開原等處採買不許于打牲之處採買云

以王國昌爲兵部督捕右侍郎

前督捕右侍郎丁憂服闋

改督捕侍郎王國昌爲兵部右侍郎兼都察院右副

都御史巡撫山東

巡撫李鈞未任以病予告尋補安徽

丁丑冬有

旨三品以上朝官年及六十許乘肩

輿入東西華門至闕門蓋聖朝優老之意先是百官皆由長安門出入惟內閣由東華門然亦必易馬始得入又滿洲閣部大臣皆騎無肩輿者自是亦多乘肩輿矣

河南巡撫李國亮疏言滎澤縣北臨黃河丹沁二水會歸黃流逼近城下查滎陽郡舊基高阜將縣城移建于此可永無衝決之虞部覆不允得旨這遷

移滎澤縣城着照該撫所題行

估計銀一萬二千兩部允先動支地丁銀八千兩

華亭門人王原令詒說雲間人蕭中素字芷涯木工

也居亭林好爲詩往往多佳句晚年傳藝子孫從受詩者數十人又有鍛工胡姓號良甫居茶山亦好爲詩而不及蕭云

南渡馬阮用事濁亂極矣惟追復懿文太子諡廟號興宗追上建文帝諡曰讓皇帝廟號惠宗景皇帝廟號代宗補二百餘年未舉缺典又追封開國功臣傅友德麗江王諡武靖馮勝寧陵王諡武壯又予遜國忠臣諡方孝孺文正景清忠烈鐵鉉忠襄徐輝祖忠貞之類此天理人心之至公不可以亂邦沒其一節之善也

甲乙事案載兵科給事中陳子龍疏云清歌漏舟之中痛飲焚屋之下想見金陵當日馬阮當國光景欲爲東晉南宋豈可得乎

槎杯元銀工朱碧山所製有古篆二十八字云欲度銀河隔上闌時人浪說貫銀灣如何不覓天孫錦只帶支機片石還朱名華玉浙之秀水人杯是故吏部

孫侍郎北海

承澤家物

山西某方伯家富鉅萬子孫敗其產其孫某不慧至持銀椀行乞于市陳大司徒說

御史荆元實請以宋范仲淹從祀

聖廟下九卿集

議不行元實號敢言後假歸予爲左都御史畱之再三不得以病卒于天津舟中

戊寅六月

上聞廂白旗原任步軍校博爾輝年

九十有九引

見暢春苑

召戶部左侍郎庸愛

諭給全俸米三十八石銀八十兩終其身又

命

八旗都統查男婦高年者以

聞又得三人其一百

六歲一百三歲皆

賜銀布有差

五月山東巡撫王國昌進長人鄭克巳長六尺八寸

兵部以 聞召見景山

賜食畱侍禁中克巳新

城人業農故山西寧武道僉事獨復浙江嘉湖道僉

事問玄之族也是時年三十二

是秋陝西亦進長人某其長與鄭等子于乾清門見之

宋任淵撰山谷精華錄八卷詩賦銘贊六卷雜文二卷宋槧本也有章丘李中麓太常開圖書印記淵自序云萬寶集于前則萬其價萬其色因不無去取擇而千之亦自具一可否有上選焉黃太史山谷集幾萬其篇章走常節其要而謬注之什之一也然其間猶有幽蘭叢桂奇玉特殊萃類拔出者又別帙焉是上選也一日雷子誠過而見之喜欲授梓來索實版故併述其所以然而與之天社任淵序按淵卽注陳后山集者惜錄中取舍未愜人意耳

戊寅六月保和殿大學士兼戶部尚書張玉書丁母何氏憂七月初二日以刑部尚書吳典爲保和殿大學士兼刑部尚書

雲南巡撫石文晟疏言元江廣化廣南廣西四府界連粵西南太慶思四府之外烟瘴特甚請援粵西例于滇省內地郡守之中特疏調補三年俸滿照臺灣例卽行陞用又鶴慶順寧永昌三府及臣另疏題改府治之北勝州鄰逼蒙番接連中甸外卽烏思藏之地甚爲緊要嗣後鶴慶等府缺更祈簡選賢能之員五年稱職亦卽陞擢部覆得旨允行

祭告五嶽四瀆帝王陵寢 先師孔子闕里舊例遣  
侍郎副都通大至四品京堂而止翰林則閣學掌詹  
至少詹而止予爲祭酒日曾與禮部言及輒云例不  
開列丙子之役則讀講學士雲麾使皆列名矣丁丑  
之役則祭酒已下至諭洗讀講悉列名矣不知例起  
于何年也

戊寅六月得洪洞范彪

西鄆

書略云丁丑三月恭捧

手教確是講學之書卽如論文成一節名正言順馮  
恭定公有言除却氣節事功文章將于何處見道學  
先生云陽明卽不名道學而氣節事功文章皆是第

一流人物先生豈止以道學予文成哉爲萬世立公  
論爲昭代嚴祀典也近日時文選家竟指文成爲異  
端狎侮前哲訕謗學官先生謂其無羞惡之心某更  
謂其失爲下不倍之道也至于黃梨洲學案曾見原  
藁屬意處專在文成亦屬偏見某取其收羅明儒之  
富兼取其自序處不諱淺深各得醇疵互見之意故  
統錄之以備參考此霍渭厓之所以失入也先生公  
論竊欲添注于渭厓幅中以見後人眼目欺瞞不得  
誠有如東林諸賢會議者可否候裁敝鄉辛復元先  
生學本闇然某雖極力表章而人微言賤今不與荒

烟蔓草同歸滅沒者實自康熙二十二年十月十二日大疏始矣跡此舉動因輒以小刻備考兩集僭瀆左右妄干立宴旣荷俞命敢不拜嘉河東分守吳公入境卽齒芬見及雖未謀面一時枯木春而冷灰然先生之德愛噫甚矣過矣長白山錄考核博而有要篋中著作如織倘惠然肯來引領望之

沈作喆寓簡云許詢與沙門曇彥同建浮圖未成而詢亾彥長年及見詢後身爲<sub>云</sub>岳陽王答鎮越州<sub>云</sub>按

立度與王謝道林同時彥安得<sub>云</sub>歷宋齊梁末尚在殆不足信

特擢工科給事中彭鵬爲貴州按察使司按察使容齋隨筆載樂府有白鴿鹽神雀鹽卽昔昔鹽刮骨鹽之類

以宗人府府丞金璽爲左副都御史

副都御史劉元慧休致

原任禮部左侍郎兼翰林院學士嚴我斯卒嚴湖州歸安人康熙甲辰狀元予告在籍

友人顧炎武字寧人別號亭林按顧野王讀書處名顧亭林在華亭



以太常寺卿梅鋗爲宗人府府丞

上用人慎重多

命內閣下詢九卿予從來不敢

徇請託未嘗輕薦一人丁丑戊寅間以吏部開列應

陞人數內而聞見最真者三人從公首言于衆幸不

拂于清議獨蒙 點用則臨江府知府李濤以舉陞

兩浙都轉運使襄陽府同知鞠宸咨陞潞安府知府

鄖陽府知府衛台瑞陞陝西潼商道副使內李鞠皆

山東人定例同鄉不得相薦舉予云 明旨下問

惟期得廉能之官知而不言則虛 上咨詢之意

故破例言之以俟公論云又嘗舉河南按察使孟世

泰尋陞貴州布政使予忝九卿已九年所推薦不過  
此數人然其人皆不知也

賜禮部侍郎掌翰林院事韓莢 御書篤志經學

四大字

以都察院掌院事左都御史張鵬翮爲刑部尚書

擢戶部左侍郎王士禎爲都察院掌院左都御史

康熙三十

七年七月  
十三日

以都察院左僉都御史王焯爲太常寺卿大理寺少

卿王紳爲僉都御史

戶部右侍郎王揆轉左侍郎以都察院左副都御史

錢三錫爲戶部右侍郎太僕寺卿吳涵爲都察院左副都御史通政使司右通政勵杜訥爲太僕寺卿沈氏大姑者本紹興人父達仁僑居京師以字同郡朱謙穆謙穆幼孤母龔氏年十九苦節撫子迄于成立家貧賴其舅某贍廩以給朝夕康熙丁丑之秋始納采沈氏以貧故未能娶也無何謙穆病且篤大姑聞之自誓歸朱脫夫有不諱願奉孀姑終身言已卽日命駕歸朱氏居五日謙穆死大姑撫屍一慟而絕康熙戊寅六月二十八日也年甫十九夫婦死不踰日有八十老人蔣玉生者敘述其事傳之而詞不雅

馴予因略次之如右

七月二十九日昧爽

大駕發京師謁

永陵

福陵

昭陵出古北口出塞

命總督管直隸巡撫兵部尚書于成龍原任總河兵

部右侍郎王新命開霸州新安等處新河告成

賜名永定并

敕建河神廟于保定府

御書

賜額七月

命會視漳滏二河

允貴州布政使王毓賢請建其父原任四川提督王

之鼎祠于貴陽府

御書賜額曰忠節垂芳

之鼎殉節貴陽

以都察院左副都御史金璽爲偏沅巡撫

巡撫楊鳳起罷

以宗

人府府丞梅鋗爲都察院左副都御史太僕寺卿勵  
杜訥爲宗人府府丞左通政錢晉錫爲太僕寺卿  
副都御史額倫德公說京師一少年好吹橫笛每風  
月之夕輒操數弄一日日未暮坐院中手笛吹之忽  
有綵衣小兒自外而入頃刻至數百人結束如一堵  
墀盡滿懼避室中引被蒙頭而臥久之寂然聞其無  
人不知所往自是不敢復吹笛

副都御史吳匪菴

涵

說宜興許生者年十七八居近

村一夕入城玩月長橋橋上先有二女子皆姝麗與  
許目成久之是日宿于其親某家漏下二鼓聞扣門

聲啓視之卽長橋所見侍婢也曰小姐申意許郎有  
夙緣明日歸當來議之許不知所謂唯唯而已明夕  
獨坐村墅婢果至申前約許曰當告父母耳父怒曰  
此非人也何議姻之有此婢去又明日婢再至曰小  
姐來矣言未旣女子已入室中光豔照人真絕色也  
請見其母母悅其美豔柔順許之奩具幃帟之屬咄  
嗟備陳于室多非人間所習見者許乃與定情焉踰  
月其父往投訴于城隍之神女子已知之謂許曰翁  
疑我我何面目居此且與君夙緣止此今當去矣妾  
已姪他日當使采蘋來邀君一至山中爲別采蘋婢

之名也遂去奩具之屬亦不見踰歲采蘋果來邀許俱行令閉目頃之已至山中峯巒秀麗一洞哈呀中啓采蘋引許入所見奇花異鳥迥非人間有美女數百人皆鳴機織作錦綺炫目不可名狀女迎許入閣設榻坐視之則星冠霞帔爲女道士裝謂許曰郎別來無恙翁姑無恙向所姪今已生女故欲君知之然不可將歸且畱山中爲擇佳配因叩以夙緣之說曰妾前生唐開元宮人也君前生亦爲內侍一夕偶語有婚姻之約爲上所見箠殺之君投胎已歷數世妾誤託狐身賴勤修煉得證仙籙以夙緣故訪君陽羨

得遂昔盟且爲君生一女夙願畢矣請從此辭當令采蘋時通消息勿以爲念因贈以二葛奇妙光瑩云歸獻公姑許欲畱止尋伉儷之好不可曰緣盡矣慮有幽譴遂令采蘋送歸後十三年任少京兆弘嘉字葵尊亦縣人也一日同一士夫訪許之父方飲酒而采蘋至曰所生女已能通五經將適人矣輒來相報聞座客方談易采蘋笑曰諸君所說皆俗諦耳經意殊不爾因請之講乾卦妙義皆出意表因言女子早通五經此皆夙昔所聞非以臆說女子博通百家二氏之書不僅諸經也采蘋至今尚往來許氏不絕女

子則不復至矣

同年秦宮諭留仙

松齡

寄所輯著毛詩日箋屬子序書

云詩之必用古序先儒言之詳矣然首句確有承授不可移易後序未免雜以講師之說或非詩之本意頴濱詩傳止取首句不為無見注疏之外則歐陽氏蘇氏呂氏嚴氏李氏黃氏多所發明朱子斥棄舊說遂使美刺之意盡亾然其中有不悖古序文從字順亦有勝諸家者未可廢也明儒則郝楚望何玄子二家最善松齡誦習之餘間倣黃氏日鈔之例於諸家之說稍為折衷而偶有鄙見亦附著焉

云

此書所論

與予夙昔之見頗同其所采取亦甚簡當當為序而傳之

梁溪秦靖然字藥師宮諭從子以宮諭命來執贄貽予宋槧韓文公集歸震川家舊物也有熙甫印記是宋寶慶三年承議郎特添差通判南劍州軍州王伯大音釋有伯大序所謂畱耕王氏者即其人也今坊本韓文考異無此序

譚公道者惠州人幼為人牧牛後得道羅浮一日降乩題王子千太守

煥

憶雪樓長句云鷺城刺史城西

住伐木結樓最高處當牕便見四百峯遶屋何須三

十樹江光山色望無邊不學蘇森慣懶眠雨過披襟  
共長嘯月來把酒問青天滄桑幾度荒蕪久恰喜停  
驂向君後疎櫺白屋只尋常徑轉林開已非舊知君  
元是住山人五馬南來不失真試倩維摩畱妙筆吳  
綾一幅可傳神滿前花開復花落人情翻覆秋雲薄  
何如萬卷攤匡牀么鳳飛來棲綠萼百年瞬息本無  
多及時行樂莫蹉跎紛紛紅土爭顏色奏爾瑤琴白  
雪歌載笠他時約蓬島瞻二字依稀挂檐角尊中有酒綠  
如澗會須坐向樓頭酌又一詞調江城子亦可誦  
皇甫百泉涉解頤新語殊不能啓發人意非徐昌國

楨談藝錄之比此書戊寅秋九月門人蘇州通判張  
友宓所寄

潘烈女六安州人御史某五世孫父瀚生員幼許聘  
舉人夏聲之子待年于家夫夭死其母往弔未歸女  
自經以殉門人孫戶部謙文益來徵詩惜其家世年  
月皆未詳聊記梗槩于此

阿舍經言人壽八萬歲時毘婆尸佛出世人壽七萬  
歲時尸棄佛出世云下至賢劫第三尊迦葉佛出世  
人壽亦二萬歲其次第四尊卽釋迦牟尼佛當周昭  
王時年三十成道住世四十九年年止七十九耳去

第三尊世尚未遠何以壽遽不滿百歲佛書支離多不可以理詰如此而內經素問黃帝問于天師曰余聞上古之人春秋皆度百歲而動作不衰今時之人年半百而動作皆衰何也岐伯對曰上古之人法於陰陽和於術數故能形與神俱而盡終其天年度百歲乃去今人不然故半百而衰云云夫軒轅在五帝之前而問答如此殊與末世年壽無異以此證阿舍敘七佛其誕妄益較然矣乃小司馬補三皇本紀又云天皇兄弟十二人立各一萬八千歲地皇十一人亦各一萬八千歲其誕妄與阿舍經又何以異

趙松雪墨梅一卷甚饒氣韻後書陳簡齋五絕句自跋云世之論墨梅者皆以花光爲稱首而簡齋五絕句誠爲絕唱余旣效花光作墨梅圖復寫此詩于後

大德十一年二月十三日子昂記

十一月十三日 駕入

高麗史朝鮮產金銀鐵水晶鹽苧布白硃紙狼尾筆果下馬長尾雞獬海豹人參

侯官門人林佶字吉人說黃公石齋初公車時墮水隨福州南烏龍江中逆水而上至福城北二十里白沙登岸自言初不見水至一宮殿有王者冕旒坐堂

上迎揖命坐示以金書二大字審視之乃倪黃也是年壬戌登第入翰林與上虞倪文正公元璐同館交最善後先後殉國以死乃知江神之示預兆之矣先生繼配蔡氏能詩文尤工書書法與先生亂真近始卒年八十矣

以總督管直隸巡撫兵部尚書于成龍為河道總督

總河董安國罷

仍以奉天府府尹徐廷璽副之

刑部尚書張鵬翮改兵部尚書兼右都御史總督江南江西以工部尚書李振裕為刑部尚書工部右侍郎熊一瀟為工部尚書

以工部左侍郎提督順天學政李光地為直隸巡撫改兵部左侍郎兼都察院副都御史起復原任工部右侍郎李枏為工部左侍郎以內閣學士顧藻為工部右侍郎大理寺少卿胡會恩為內閣學士兼禮部侍郎

以光祿寺卿高喬為太常寺卿

太常寺卿王焯罷

右通政江縈為

光祿寺卿

擢巡撫陝西右副都御史巴錫為總督雲南貴州兵部右侍郎兼副都御史改戶部右侍郎博和諾為兵部右侍郎兼副都御史巡撫陝西



十一月二十四日

命戶部尚書陳廷敬都察院

左都御史王士禛原任左都御史王鴻緒直南書房  
陳氏鳳陽府虹縣民陳文升女也初文升父宗卿以  
事株連繫獄有陳玉秀者仗義營救得免因以女許  
字玉秀子某時甫八齡值歲祲玉秀將攜其子遠適  
畱半鏡爲他日之驗泗州人周二虎者土豪也瞰玉  
秀年久不歸強委禽焉女知之以死自誓二虎率衆  
劫之女自縊以死時康熙三十二年九月二十四日  
女是時年十八矣父母葬之而歸妹于周十月初十  
日忽有羣犬開其墓女復甦過者聞棺中女子啼聲

走報其家父母亟趣至問曰汝死已半月今人耶鬼  
耶女曰女非鬼乃人也急開棺攜歸二虎聞之復欲  
劫娶女遂投玉皇菴爲尼二虎終凌偏不已女乃免  
其鄰黃子貴妻胡氏同赴京師訴于刑部康熙三十  
七年戊寅十二月事也女年二十有三

福建巡撫宮夢仁疏漳浦縣士人林梅元妻魏氏現  
年一百四歲循例請旌部覆建坊表曰貞壽之門  
鉅鹿太學生董繼芳者居城東二十里小樹村其父  
中瑋明崇禎間貸縣人吉夢川百金貧不能償易代  
之後中瑋夢川皆物故夢川有孫惠迪爲諸生故藏

董券以繼芳貧窶不往索也後繼芳具知其事自詣  
惠迪願以父遺宅一區抵逋惠迪不受強之再三然  
後可康熙庚午畿南旱惠迪轉粥其宅以給朝夕值  
不百金繼芳又貸金贈之曰君祖與吾先人緩急相  
通誼不可忘今君食貧吾忍坐視耶敢以是補前償  
之不足惠迪堅不受曰前已受宅今粥值偶不得善  
價耳君何與焉繼芳仍遍告鄰里共爲言之惠迪乃  
受于是諸生袁猷吉大用等高兩人之義公舉于縣  
縣令陳汝明黼功蜀人予門生也爲文旌其義行因  
略之于此以風世之儂薄者云

邊鸞長安人丹青馳譽于時常轉徙澤潞間畫帶根

五參極工巧

宣和畫譜

漢人如韓詩外傳說苑之屬有最可笑者如孔子適  
楚至于阿谷之隧有處子佩瑱而浣子曰彼婦人可  
與言乎抽觴以授子貢云又抽琴去其軫云抽綸絡  
五兩云而證以南有喬木漢有遊女四句豈不近兒  
戲乎

康熙三十八年巳卯元旦晴予同內閣大學士後先  
詣保和殿候駕行禮仍趨太和殿侍班故  
事惟內閣及都察院堂官得侍殿上翰林院學士侍

直殿中閣臣憲臣在檻外東西相向

正月初七日以

南巡視河點扈從諸臣都察院

左副都御史吳涵與焉

二月初三日

駕發京師

工部尚書熊一瀟內閣學士兼禮部侍郎徐嘉炎俱

以原官致仕以詹事府詹事顧祖榮為內閣學士兼

侍郎

時顧扈從南巡

少詹事徐秉義為詹事兼侍讀學士

命吏部尚書熊賜履禮部尚書張英日侍

東宮

進講性理

上舟次東昌府

賜郡人原任刑部左侍郎任克

溥

御書曰玉壺朗映仍

諭復原官給與

誥命異數也

西華門外廣濟寺老僧湛佑有

東宮睿賜方竹

杖一乃文徵明故物上有徵明篆書鳳尾二字又八

分自記一篇是八十七歲時書

張敦復

英

大宗伯言有色侍衛者滿洲人少曾駐防

東粵性嗜花卉凡南方草木異種皆致以歸老而退

閑深諳栽植之法所居精舍數椽佛桑建蘭茉莉之

屬環遶其中更不凋謝又多取蝶蛋養之奩中每冬

月梅花盛開輒下簾放蝶千百為羣飛舞花間忘風

雪之寒沍客至則淪茗治具極歡亦一高士也

上諭截留漕米二十萬石于淮安府邳州以七萬石減價糶于淮揚被水七州縣以一萬石減糶于邳宿等處窮民以二萬石貯淮揚二府

上諭赦山東江南浙江經過地方見在議降罰各官及罪人殊死以下

康熙三十七年十月二十三日

恩詔軍民七十

以上許一丁侍養仍免雜汎徭役八十以上者給絹

一疋綿一斤米一石肉十斤九十以上倍之

詔

下郡邑各撫臣上其數于戶部直隸九十以上五百

三十五人奉天九十以上五人山東九十以上二千三百三十人百歲以上九人山西九十以上二百五十人河南九十以上四百五十一人江南九十以上一千六十五人百歲以上三人浙江九十以上九百八十二人陝西九十以上三百十七人湖廣九十以上二千八百五十人百歲以上四人江西九十以上五百八十人福建九十以上三百六十九人廣東九十以上五百九十一人廣西九十以上一百十四人四川九十以上一十三人雲南九十以上四百五十一人貴州九十以上九十四人按宋開寶五年鄆陵人

許永罷盧氏縣尉詣匭上言臣年七十五父瓊年九十九長兄八十一次兄七十九欲乞近地一官以就榮養上悅其父子兄弟俱享遐齡賜瓊襲衣犀帶銀鞍勒馬帛三十疋茶二十斤授永鄆城令是時瀘密齊沂萊江吉等州各奏八十以上呂繼美等二十九人並賜爵公士史冊書之以爲盛事然未有如今日之盛者也故備列之

宋思陵得李伯時畫人參地黃二藥裝潢之御書東坡二贊有鍾太常家法贊云上黨天下春遼東真井底元泉傾海腴白露灑天醴靈苗此孕毓肩股或具

體移根到羅浮越水灌清泚地殊風雨隔臭味終祖禰青楹綴紫萼圓實墮紅米窮年生意足黃土手自啓上藥無炮炙齧盡根柢開心定魂魄憂恚何足洗糜身副吾生旣食首重稽地黃贊不錄  
焮音挂漢書哀帝時有博士焮欽與申咸上書理師丹者又賊捕掾絮舜見張敞傳終南羣盜備宗見王尊傳備音倍

擢貴州按察使彭鵬爲巡撫廣西都察院僉都御史

巡撫王起元罷

駐蹕揚州府

諭加外轉原任掌印給事中李宗

孔爲大理寺少卿

上諭戶部蠲免江南浙江康熙三十四五五六七等年舊欠地丁錢糧及山東泰安等十七州縣帶徵錢糧又除兩淮加額二十萬及各省鹽差關差以軍興增額百餘萬悉除之

董卓將謀廢立謂司隸袁紹云紹橫刀長揖曰天下健者豈惟董公班固哀帝紀贊亦云婉變董公謂董賢也

尚某言昔在粵東與都司李某交善後李歿其妻售濠畔街宅與尚仍分院而居兩家往來如親串然一

日李妻私語尚夫人有女及笄而病病且甚異欲求尚診之而難于言夫人以告尚曰與李君夙交好言之何傷李妻乃言女初患腹痛久之溲溺甚艱溲內有物能游泳或二或三似有鱗鬣者取視之乃比目魚半體也身微黑止具一目其背白置水中果如所云試診之乃肝氣久鬱所致投以疏肝之劑而愈李河南人

金陵丘翁者平生好善遇道釋尤加敬丘一子爲諸生有文名年三十矣忽覺遍體骨痛方藥無効久之身體忽漸縮小日短二三寸丘生素願而長數月後

縮至寸餘聲如蠅螞家人置几案上以茶椀覆之翁  
嫗旁皇莫知所爲一日有道士形神清異坐門外數  
日不去亦不募化翁延入叩之初不肯言叩之再四  
始問君家有異事乎翁悟呼嫗出同禮拜極虔述子  
疾狀道士曰吾知之久矣以君積善故遠道來此予  
之藥三緘令翁于夜深暗中自取研水令服之三日  
後必有驗但勿見燈火勿近婦人手言畢飄然而去  
翁遵其教戒次日視其子已長數尺又踰日身長復  
舊矣三日後道士竟不至試開第三緘緘內有一小  
人寸許躍出落地上覓之不得丘生遂謝諸生爲道

裝今五十餘尚在

有任叅將者藩下世職也其第三子名中麟幼不與  
羣兒嬉戲稍長好讀書間爲詩作畫娶婦生二子其  
兄歿中麟當襲世職力辭日兀坐小園繙道書夙奉  
呂真人甚虔一日閉門作觀想欲爲真人寫照于縑  
素移時不能下筆隱几而臥及覺則縑上畫像已就  
濃睂短鬚與俗所傳真人像迥殊自此世緣益澹告  
其母欲往廬山母不許曰吾老矣汝忍絕裾往乎中  
麟謹受教曰天上固無不忠孝神仙遂止不行母以  
壽終旣葬中麟盡粥其田宅攜妻子三人往遊廬山

愛簡寂觀將終焉妻泣曰君卽留此粵中已無棲止之所妻子將何依中麟曰吾固知之乃買茅屋八九間石田十餘畝于山中令居之而身居觀中日唯兀坐月令其長子一往省視久之出衣裳盡散道衆集山中羽衲話別云今日亭午吾將行矣及期沐浴更衣跌坐而逝時正午皆見紫氣凌空中麟乘白鶴揮手謝衆而去肉身今在簡寂觀東廊

居易錄卷三十終

居易錄卷三十一

濟南 王士禎 著

金陵李氏有酒樓臨市一日有道士十八人來樓上食畢覆其椀而去椀下各遺一方治諸疾病主人祕之扇置箱篋數日啓篋則不存矣方懊恨明年盆中牡丹花開十八枝每枝花上各有一方如前似金書者驚喜而錄藏之製丸散活人多奇効金陵人傳牡丹十八方是也

江寧有蕭生者食香葷則死又有王生者飲茶則死必二三日始甦醫無能識其故者誌于此俟明醫或



能知之

五月十七日

聖駕還京內閣九卿諸臣迎于通

州

以前左都御史王鴻緒爲工部尚書

賜致仕工部尚書熊一瀟

御書曰怡情泉石致

仕內閣學士徐嘉炎

御書曰直西清又一聯云

樹影不隨明月去溪聲長送落花來又唐人張旭隱

隱飛橋隔野烟絕句詩一首

皇太子賜嘉炎

睿書博雅堂大字又一聯云樓中飲興因明月江上

詩情爲晚霞又

賜睿製詩一首云玉臺詞藻重徐

陵經筵由來博雅稱每見趨陪鷓鷯側神仙風度在  
觚稜

上巡江浙

賜扈從在籍督撫提鎮藩臬諸臣

御筆頗多給假吏部侍郎彭孫適曰松桂堂檢討

尤侗曰鶴棲堂御史盛符升曰年登耄耋時侗年八

十二符升予門人年八十五矣會

萬壽節駐蹕吳

門而諸臣得邀

天藻真曠世奇遇也他未及錄

五月二十三日臣左都御史王士禛

內直南書房

蒙

恩賜

御書素練一幅云瞳瞳曙色上帆

檣野水波添滿路光知是皇畿程日近林風吹送柰

花香蓋舟行

御製近詩也有

御璽三日佩

文齋曰康熙御筆曰萬幾餘暇

六月二十日

內直蒙

恩再

賜

御書大

字一聯云煙霞盡入新詩卷郭邑閑開古畫圖

御璽三日佩文齋曰康熙御筆曰保合太和同蒙

賜者戶部尚書陳廷敬禮部尚書張英工部尚書王

鴻緒

戶部左侍郎王揆調吏部右侍郎仍兼翰林院學士

吏部左侍郎趙士麟卒于位

特諭起原任左都御史郭琇為湖廣總督以兵部右

侍郎兼都察院副都御史  
上南巡過吳江縣詢

知琇為令時清廉愛民故有是命

刑部左侍郎田雯調戶部右侍郎總督湖廣兵部右

侍郎李輝祖入為刑部右侍郎

漢書大司徒馬宮本姓馬矢宮仕學改稱馬馬矢姓

甚奇王弇州宛委餘編曾載之複姓

宣和書譜云桓溫生未暮溫嶠見之云此兒有奇骨

因以溫名之如所云為太真之辱矣

書譜杜光庭傳撰高士傳百卷今其書不傳然古來

高士滅景雲棲安得有百卷之多使麒麟鳳凰與牛

馬鴉鵲肩隨踵接何足貴耶

已卯六月漢軍御史郭金城疏請裁中外冗官下九卿議疏內亦及都察院官予時掌院事會議日昌言于衆曰御史爲朝廷耳目之官有彈劾之責所云猛虎在山藜藿不採關繫言路豈同閑散况明時兩臺設御史至百二十員本朝初裁其半再裁畱四十員又裁僅畱二十四員雖巡按停差而現存之差有六掌道六協理稽查六部京畿道寶泉寶源兩局登聞鼓五巡城六巡鹽等差以及大祭祀大朝會監禮監宰糾儀待班鄉會試內外監試諸差往往

乏人余尚欲請增數員庶幾備官無曠詎可裁乎滿太宰庫勒納公見予言之侃侃遂首肯惟漢軍御史八員中畱其五巡視五城餘三員裁去并裁漢軍都事一員而他御史如故尋奉旨如議時裁去通政司漢叅議二員大理寺漢寺丞一員春坊漢中允贊善各一員漢行人四員

上駐蹕江寧

御書治隆唐宋殿額遣

皇子直

誠兩郡王賚懸明太祖孝陵踰日

駕幸鍾山躬

祭

上親祭明祖孝陵至是而三矣

楊慎藥市賦人參三極來自高句驪之國桃枝九折

出于嵩昆明之陬

丹鉛錄浯水有南浯北浯北浯在琅邪靈門南浯在零陵九疑按北浯在今青州之安丘縣南浯即元結之浯溪

七月命兵部尚書席爾達署川陝總督事

吳赫解任

以都察

院左都御史馬爾漢署兵部尚書事

七月二十日

御前發下元人陳經手錄賦題備

忘十五卷蓋備塲屋之用者有嘉靖六年丁亥石東

居士跋略云子經

經字

無子其遺書皆歸外孫古氏古

氏自四明徙居餘杭

以翰林院編修阿金為福建正主考滿保為浙江副

主考喀爾喀為河南副主考法保為陝西副主考滿

洲翰林官出典鄉試自今科始

阿金喀爾喀字辛未科所取士也

達賴喇嘛進表其頌聖稱總統天下率土咸福文殊

菩薩至聖

皇帝手執蓮花清淨座下又稱壽與

天同至聖天朝

皇帝大護法主又稱壽與天同

明並日月大護法主人

以內閣學士噶禮為巡撫山西都察院副都御史

巡撫倭倫

七月二十三日進呈編次

上諭

皇太子塞

外用兵機宜蒙降

御筆云善用兵者役不重興

糧不三載故師不久暴而天誅亟決下注漢書二字

宸翰用硃書結構精密迺緊蓋引馮奉世傳中

語仰瞻歎美者久之時同被

旨者戶書臣廷敬

禮書

臣

英工書

臣

鴻緒暨左都

臣

士禛

特俞巡視兩淮御史卓琳疏請蠲免白駒等十四場

三十七八兩年竈戶折價銀三萬三千六百兩有奇

朱檢討竹垞書來寄所著經義存亾考十六卷云此

書已成凡三百卷今所寄者纔連山歸藏周易止於

北宋則全書之浩博可知已

已卯閏七月十三日門人莊戶部廷偉攜宋榻虞永

興夫子廟堂碑來觀古色鬱然的是舊物是唐荆川

家藏本末有董思白贗書一跋反成蛇足耳

又趙子昂絹書草訣歌一卷疎密斜整有不衫不履

之態末自跋云世有草書訣本非善草書者所作故

多謬然初學便於誦習兼其間亦有可取者故戲書

一過以□子久松雪翁

又唐六如畫溫公獨樂園凡七圖曰讀書堂弄水軒

釣魚菴種竹齋采藥圃澆花亭見山臺自署正德庚

辰春三月上巳畫於桃花塢夢墨亭中泉石竹樹秀

絕軼塵每幅有文徵仲題五言詩末有徵仲書獨樂園記跋云余觀子畏獨樂園圖徵明十年前所書不意復覩於江陰黃吉甫家今日多在病鄉精神稍減乘輿重錄此記于後書罷不勝慨然衡山居士記書尤佳

閏七月十五日以河魚腹疾未入直是日蒙 賜

南書房諸臣人 御書二幅內臣以臣士禎偶病

未入直復 命明日啓 奏奉 旨今日事多

未暇回時補 賜時將以十七日哨鹿塞外也

十六日 上以 御製廣濟寺碑文 賜觀

字方圓徑寸適美妍妙絕似虞永興末署 皇三子

多羅誠郡王胤祉奉 敕書 上好書學

宸翰集帝王之大成乃 東宮暨諸 皇子皆正

書如此蓋唐宋以來僅見之盛事也

蒙發下宋高宗書千文二本 賜觀皆署紹興二

十三年歲次癸酉二月二十三日御書院書其一頗

似聖教序其一似雙鉤廓填者

閏七月十七日 駕幸古北口

命吏部尚書熊賜履禮部尚書張英侍 東宮日

講周易

巡撫貴州副都御史王燕疏稱安順府鎮寧州儒士  
曹邦傑幼習詩書長諳經史以康熙三十七年三月  
云亾其妻張氏出自儒家婦道旣修文理亦繕結禱  
二載遽夭所天作文告祭誓必身殉當卽焚邦傑遺  
稿而自經于柩側從容激烈出于自然取義成仁允  
堪不愧云疏末載祭夫文曰嗚呼痛妾命之不辰也  
幼失嚴慈撫育無人形影伶仃莫可言狀幸得于歸  
夫子庶幾夙夜事之百年守之憶吾父擇壻時亦曰  
吾女幸矣終身之仰望者非壻耶如賓如友同心而  
同德者非壻耶私心自慶在妾尤深孰意甫歸故里

遽嬰疾疾妾向之喜者化而爲憂餐忘寢廢祈以身  
代而天不假年黃梁一覺羽化昇矣傷心哉夫子之  
人如金如玉夫子之文如潮如海而今已矣不可復  
見矣天耶人耶孰爲之耶禮稱未亾人妾不忍未亾  
也詩云之死矢靡他妾唯知之死也九泉匪遠妾必  
從之嗚呼淒淒惻惻踽踽涼涼拊膺呼號瞻望無將  
臨風灑涕對景悲愴削骨代筆曷罄衷腸夫子乎其  
知之乎何不飀輪少待使妾欲追而難跡乎靈其不  
昧庶鑒妾心邦傑以三月二十三日卒張氏以二十  
五日殉年二十七

蘭于花品中最清幽而其根能殺人後魏人乃有名  
魏蘭根者取義亦不與矣

先始祖母初夫人爲天風吹來事載家乘萬曆間伍

寧芳袁萃學憲記之頗得其實而賀燦然駁之以爲語

怪非也謝在杭肇浙五雜俎亦載此事云國初歷城王

氏方鰥居一日大風晦冥良久旣霽於塵盆中得一

好女子年十八九云外國人也乘車遇風欻然飄墮

遂爲夫婦今王氏百年科名貴盛無比皆天女之後

也蓋傳聞異辭曰歷城王氏曰外國人皆譌也

五雜俎云八月望有月華或言夜半或言微雨後或

言凡秋夜之望皆有之五彩鮮明旁照數十丈如金

線者百餘道或言但紅雲圍繞之而已康熙己未庚

中間先司徒府君以中秋夜召客客散畱徐隱君東

癡夜宿而府君獨坐月中徘徊未寢漏下三鼓忽見

月華如前所云五采金光灼爍射人不可名狀急呼

隱君起重命觴酌達旦明日隱君賦月華篇紀事載

### 新志中

華山經云羅隱之新淦玉笥山道士來居華山一觴

一詠高情自適晉天福中賜號曰希夷先生稍在陳

搏之前是五代有兩希夷皆居華山也



夫子今濟南長山縣也見左氏傳

胡應麟元瑞詩藪云晏同叔冰從太液池邊動柳向  
靈和殿裏看靈和字僻又與柳不切易作長楊按靈  
和乃張緒事何得謂僻而不切元瑞號博雅豈南史  
亦未之讀耶

九月初七日秋審畢九卿會稿中有河南司閔煥山  
西司郭振羽廣西司竇子雲三起初擬情真余謂凡  
以救父罹罪者多議矜減此三人雖以刃然止當論  
其救父與否不必分挺刃也惡意緩決爲當諸公以  
爲然皆改緩決

以左僉都御史王紳爲大理寺卿

大理卿  
李錦罷

少詹事王九

齡爲都察院左僉都御史

以翰林院檢討劉涵爲揚州府知府先是巳巳以翰  
林丁廷樾爲鳳陽府知府李濤爲臨江府知府汪楫  
爲河南府知府至是以副都御史吳涵請疏通翰林  
官故再有是命

九月二十一日巳時 文華殿經筵講官吏部尚書  
庫勒納熊賜履講大學是故君子有大道必忠信以  
得之驕泰以失之三句禮部尚書張英掌翰林院禮  
部侍郎阿山講易經繫辭仰則觀象於天俯則觀法

於地二句講畢

賜宴太和門

二十六日午時

東宮主敬殿會講講官內閣學

士兼正詹事特默德少詹事李鎰講大學欲修其身者至致知在格物七句庶子常在許汝霖講易經君子以言有物而行有恒一句講畢 賜茶文華殿門東陽縣資福寺唐剝也宋宣和中燼于火藏經皆化為石卷軸宛然扣之有聲事載本誌

張氏潛江人能詩有絕句云病廢機梭老廢蠶牙籤細帙興猶耽唐詩元曲都收捲日向紗窓讀二南詠畱侯云子房稱病藏機早只待功成辭漢家已復韓

雉無所事此心元自在煙霞

康熙十年潛江民吳某家屋上墜下一物形如龜有兩翅頭有一角四足如人指色如羊肝以刀刺之不能入其殼非骨非肉聲如雄鴨

九月二十七日 南書房觀唐文皇屏風帖有揭傒斯虞集諸跋雖非真跡而臨摹甚工亦高手也

調工部左侍郎李柟為戶部右侍郎

戶侍錢三錫卒

以左副都

御史吳涵為工部右侍郎大理寺卿王紳為副都御史太常寺卿高喬為大理寺卿少詹事李鎰為太常寺卿

十月初一日

上躬祀

太廟

十月十六日武英殿大學士兼吏部尚書李天馥卒

賜諡文定

十一月初一日

上躬祀

天于南郊

初五日以戶部尚書馬齊禮部尚書佛倫爲大學士  
馬齊武英殿佛倫文淵閣吏部尚書熊賜履禮部尚  
書張英皆大學士賜履東閣英文華殿各兼本部尚  
書馬齊仍掌戶部以戶部尚書陳廷敬爲吏部尚書  
刑部尚書李振裕爲戶部尚書兵部尚書席爾達杜  
臻皆禮部尚書都察院左都御史馬爾漢原任總督

兩江兵部尚書范承勳皆兵部尚書都察院左都御  
史王士禛刑部尚書原任左都御史哈雅爾圖吏部  
左侍郎兼翰林院學士王澤弘皆左都御史

上親征額魯特

御製前後出塞詩氣象高渾非

貞觀開元所及略就記憶者載于此彈琴峽云琮琤  
流水意彷彿似鳴琴曲度泉歸壑聲兼峽泛吟空山  
傳逸響終古奏清音不御金徽久泠泠會素心瀚海  
云四月天山路今朝瀚海行積沙流絕塞落日度連  
營戰伐因聲罪馳驅爲息兵敢云黃屋重辛苦事親  
征賜將士食云萬騎擁雕弓長鳴向北風龍荒彌曠

遠虎旅正驍雄戰鼓黃雲外旌門紫氣中朕躬方蓐  
食與爾六軍同勦滅噶爾丹大捷云殘寇疲宵遁橫  
衝節制兵我師乘銳氣誰許丐餘生貔虎三軍合鯨  
鯢一戰平愧稱謀畫定討罪荷天成

調禮部右侍郎掌翰林院事韓葵爲吏部右侍郎王  
揆轉左侍郎皆兼翰林院學士內閣學士李錄予爲  
禮部右侍郎兼翰林院學士內閣侍讀學士范承烈  
爲內閣學士兼禮部侍郎

會試舊例止分南北中卷康熙辛未科雲貴廣西無  
中式者御史王承詒江蔡因上疏條奏請于南北中

卷之內再分左右九卿兩議具奏奉

旨著畫一

具奏九卿因議以直隸山東爲北左河南山西陝西  
爲北右江南浙江爲南左江西湖廣福建廣東爲南  
右四川雲貴爲中左廣西貴州爲中右得

旨允

行甲戌丁丑遵行兩科闈中但握算左應中若干卷  
右應中若干卷文之佳惡皆不暇論以故真才屈抑  
頗多予爲總憲欲疏請復舊例以入直

南書房不

果上巳卯十一月副都御史梅桐厓

銅

疏言之事下

禮部部兩議以上復下九卿予時爲刑部尚書首言  
會試合天下之人才止當論文不當算各省額數之

多寡若會試分省定額則鄉試亦應分府定額乎况  
科場鉅典當防弊竇既分五經又分南北若再分左  
右恐闡中易于揣摩此又弊竇之當防者也諸公皆  
以予言爲然會總憲涓來兄澤少宗伯慎菴封持後  
議遂復兩議上之上竟從前議大司空儼齋鴻  
曰始終力主持此事者先生一人而已因記本末於  
此

上諭戶部蠲湖南康熙三十九年地丁錢糧

于氏者東昌清平人于進昌女也字劉興旺之子索  
成以家貧養于劉年十四矣將以己卯七月二十七

日完婚二十二日村中社會與旺暨妻子皆出觀劇  
女獨處閨中有修成者無賴子也傭于其鄰杜誠之  
家窺女獨居持刀突入脅之女大罵不從成持刀強  
逼之女以右手拒刃幾斷腕罵愈厲成怒且懼其泄  
也斷其脰而去知縣王吉人廉得其實修成具服巡  
撫王少司馬國上其事當修成故殺大辟于氏以貧  
窶幼女寧死不污貞烈可風下禮部建坊旌表予時  
爲刑部尚書歸記之俾勿湮沒于後

欽差部院大臣十人督修淮揚高家堰邵伯鎮等處  
河工兵部尚書范承勳工部尚書王鴻緒吏部左侍

郎王掞戶部左侍郎田雯兵部滿右侍郎布顏努刑  
部右侍郎喻成龍工部左侍郎顧藻都察院滿副都  
御史壽彙副都御史王紳大理寺卿高喬喬丁外  
艱不行  
衛中丞旣齊字爾錫山西洪洞人醇儒也自翰林檢  
討超拜山東布政使廉聲甚著入爲順天府尹擢副  
都御史出爲貴州巡撫罷歸己卯冬以分理河工入  
都日在邸中召門生黃編修叔琳講中庸一章二鼓  
始罷其靜力如此

前福建巡撫卞中丞令之

永譽

貽書畫彙考六十卷其

自撰也凡詩文題跋悉載自序云上溯魏晉下迄元

明大之忠孝之蹟法戒之圖小之文章詞翰江山雲  
物釐甲乙較亥豕當務卽休退食復然故所收視雲  
烟過眼錄鐵網珊瑚諸書獨爲詳博亦遊藝不可少  
之書也

予昔過長春寺僧院見明慈聖李太后像及田妃寫  
真皆白皙豐美田像稍似怨抑者或是病中所作  
禮部題爲援例陳請乞 賜襲封以崇先賢以廣皇  
仁事該臣等會議得先經禮部議覆閱煌端木謙請  
給博士之處無容議具題奉 旨九卿詹事科道  
會議具奏欽此仰惟我 皇上治邁千古德冠百

王創建無前之盛烈肇舉未有之隆規先賢閔損端木賜後裔雖從前並未設有博士恭遇我皇上崇儒重道之時兩賢後裔似應授與官職以彰

皇上之殊恩曠典但後裔歷世久遠伊等是否嫡派應行文該撫會同衍聖公確查嫡派將應授之人保送到日再議可也奉 俞旨

文衡山方竹杖跋語云余年八十有七矣而背未鮎髮未黃燈下猶能爲蠅頭書作畫猶能爲徑丈勢殊不自覺其爲老也有謔余者曰子多太公之五年少伏生之三歲矣余始覺其爲老然矍鑠是翁崛強猶

昔必不以老自衰忽有友人自蜀中來貽我方竹一杖因思解組已久非杖朝之時而杖鄉杖國之年又遠過焉欲贈同儕而香山社中殊無九老則不如姑存之以俟諸旦夕可用之時且以誌良友之嘉惠云爾嘉靖戊午秋八月長洲文徵明題

文徵明畫仙山樓閣自題詩云山半崔巍拱絕壁誰開雙闕峙青雲世人欲識仙凡路霞術星衢自此分嘉靖乙卯二月旣望爲竹隱作時年八十有六

趙松雪墨菊一幅題云物華有秋菊頗稱傲霜枝不謂一莖草具此松栢姿當時染翰者興言可及斯方

外史 化染灤京產異花都緣地貴寵優加香同御  
串應多爽色比朝衣更有華□本最宜陶令酒藥苗  
尤勝陸生茶江南處士窺天巧問是吾宗第幾家□  
山潘迪書

宋人李崧觀湖圖有張仁遠題詩云神鱗怒決滄溟  
水浪沸波騰亘天起巨靈擘山山爲開玉龍捲雪從  
東來腥風撼地坤輿剖長江萬鼓雷霆吼雄威欲吞  
吳越軍強弩三千皆縮手金堤旣成事已非錢唐江  
上開皇畿雕闌玉檻照東海貪看秋潮忘黍離中原  
不復民易主百萬貔貅宿沙渚倚樓望湖潮不來六

帝同歸一坵土人間廢興何代無誰能耽樂思艱虞  
良工不解寫無逸丹青却作觀湖圖

客攜宋榻定武蘭亭序來觀後有元人諸跋真古物  
也輒具錄於左方

素弱冠時盡見陳海珠氏所藏蘭亭序諸家石刻六  
十有三本然於書學要非專門不敢妄加評議此卷  
敬修父嘗珍襲之必善本也臨川危素 唐秦王得  
禊序真蹟命歐虞褚諸公臨做之近侍趙模韓道政  
馮承素諸葛貞輩皆得臨擬取衆所臨分賜諸王近  
臣惟率更令所臨奪真因勒石以畱禁中世共珍異



罕獲打榻後雖更亂石獨完存五季時契丹輦以歸  
北復道棄之慶曆中李學究得而祕瘞于土至其子  
始出石榻以售人宋景文公守定武購而藏之官庫  
後守薛師正懼榻繁傷石刻別石以徇世求子紹彭  
又模刻宅石潛易元刻由是定武變爲三刻然唐刻  
微帶肉此本字頗豐必紹彭之所模但墨燥而少潤  
耳予友敬修氏善鑑別尤愛此卷蔡中郎收爨餘之  
枯必非妄賞汪氏其世寶之至正癸巳長至前五日  
梅仙山樵卓說 禊帖自貞觀間臨榻之盛至宋蔡  
君謨薛紹彭諸公尤以此爲奇事然考其刻則定武

本爲最先此好古者所以貴得定武刻也景定咸淳  
間賈氏枋國凡諸舊刻鮮不購入其府客有廖寺丞  
者嘗承命參較擇其粹者輯成一帖俾良工王用和  
刻諸悅生堂經年乃就是則禊帖蓋未易言也此本  
鐫刻旣精打榻尤不苟危雲林所謂敬修父嘗珍襲  
之必善本也大雅宜謹藏之至正乙巳秋九月十又  
一日丙寅金華鄭濤書

又觀唐韓滉維摩不二圖南唐周文矩飲中八仙圖

宋人臨顧凱之列女圖

有喬贊成印  
柯氏清玩印

元錢選惜馬圖

富平門人朱樹滋寄舊榻佛遺教經前有釋迦畫像

文嘉休承泥金小字心經前後有周氏家藏張復之  
印麋公印項墨林鑒賞印香山之喬印武功小印王  
元美印末有王穀祥跋云涪翁云大字無過瘞鶴銘  
小字無過遺教經近世所傳右軍遺教皆唐經生手  
書耳陸太宰所藏舊本爲世罕購近日稍稍見之是  
本亦其流亞也已未長至日又有玉川子袁尊尼跋  
不錄

同年秀水曾王孫道扶子安世書來求爲其父誌墓  
以九成宮圖爲贄上方空處有弇州臨九成宮銘畫  
不書款 又明人書畫一冊凡二十幅皆莫是龍張

鳳翼文徵明文彭董其昌項德新輩真蹟極可玩  
文衡山行書紅白梅花梨花等詩前有臣受孔子戒  
圖印

明左忠毅公光斗視北畿學政有知人鑒凡所題品  
往往奇中人亦不知其何術也試順天日拔故相國  
史公可法爲童子之冠史公年少貌又寢謁謝曰左  
公對衆慰勉之曰善自愛將來社稷臣也衆出而戲  
笑之後史公果大拜南渡殉國難以死又有保定張  
某次當貢左公謂之曰汝官當至三品然艱于一第  
奈何後果以貢士仕至巡撫

先從兄太液

士

藏倪雲林畫小幅極瀟灑上有自題

詩云蕭蕭風雨麥秋寒把筆臨摹強自寬賴有□君

相慰藉松肪筍脯勸加餐予少時極愛之康熙甲辰

在揚州題程孟陽畫和之矣適觀卞中丞

永

書畫考

有王叔明自題喬松絕壑圖絕句一字不異第三句

缺處是俞字題下又注云一本作至正十三年二月

晦日倪瓚寫題詩與此同味此詩風致斷是雲林作

然叔明何以勦襲不易一字殊不可解也

黃鶴山樵畫款或作王子蒙又或作叔銘

南山之下汧渭之間想見開元天寶年此篇乃坡翁

書韓幹馬圖作也趙松雪題五代趙巖調馬圖書此

詩而自跋云以杜子美詩書之王穉登又跋云拾遺

集無此作魏公何從得之古今詞人之作散逸不傳

者多寧獨此歌而已

云

予閱之失笑在子昂或一時

誤書百穀豈一生未睹蘇集耶何孟浪至是且子美

明皇時人安得云想見開元天寶耶二公亦未之思

耶

雪中偶過卞令之中丞書舍觀李營丘雪景山水及

王右丞雪溪圖周文矩郭忠恕僧巨然高房山趙松

雪管夫人黃大癡王叔明吳仲圭倪雲林曹雲西徐

幼文張伯雨諸名人雜畫至暮又觀元刻松雪集又  
陸放翁行書古詩一首云能自得我心無入不自得  
靈府長優閑蕉鹿烏能惑濁醪吞數升浩氣漫漫塞  
醉來隱几酣屢到華胥國人生貴適情何當調語默  
放翁游作字極矯健

太常寺題爲遵

旨會議事康熙三十八年十二

月十一日奉

旨諭元旦諸臣俱集人衆煩擾請

捧神牌往來朕心殊覺未安着內閣會同內務府  
禮部太常寺考明代典禮議奏欽此該臣等考得明  
代奉先殿祭享並無向太廟捧請牌位之儀我 國

朝建立

奉先殿于內原安奉

太祖

太宗

世祖神牌朔望薦新等祀以時行禮

四位神

牌原安奉于太廟後殿每年時享遣官于

後殿

四祖神位前致祭且歲暮又有祫祭元旦復請

牌位至

奉先殿合祀似覺禮煩嗣后遇元旦

皇太后聖誕

萬壽聖節於

奉先殿行禮時停

其請

太廟後殿

四祖神牌至

奉先殿卽于

太廟後殿照

奉先殿典例供帛酒籩豆讀祝文

遣官致祭則

四祖牌位不致往來有褻而我

皇上誠敬之心亦允愜矣其祝文交與翰林院撰

擬可也奉

旨是

禮部會九卿題爲會試關天下之人材閱卷宜照從前之定例仰請 乾斷酌復成規以光大典事都察院左副都御史梅鋞題云該臣等會議得會試乃聚天下之人材而拔其尤者以光 朝廷賓興大典舊例分南北中卷衡量可謂至平又分左右未免分析太繁相應仍照舊例南北卷內不必細分左右將廬州等府滁州等州舊係中卷者俱歸于南卷其雲南貴州四川廣西四省去其中卷名色每科雲南定爲雲字號額中二名四川定爲川字號額中二名廣西

定爲廣字號額中一名貴州定爲貴字號額中一名康熙三十九年會試奉 恩詔加額明年會試應將雲南四川各加中二名廣西貴州各加中一名庶人材不致淹抑而遠方士子皆得均霑 皇恩矣奉 旨依議

今桐城相國張公

英

爲諭德時以詩集屬予評次予

見其梅花詩有云嘉名他日傳調鼎記取蟠根在草

茅曰宰相語也今果驗常熟歸少詹

允

丙辰落第後

居京師每徒步補詩相質予見其和平恬澹絕無憤懣叫號之氣歸故善楷法予謂之曰君必狀元及第

已未果傳臚第一人詩爲心聲諒矣

李容齋天馥相國壬戌典會試得士最盛子孚青先以

已未進士入翰林一日宴集諸門生史講學夔獻詩  
有云郎君館閣稱前輩弟子門牆半列卿時以爲不  
減唐人文章舊價畱鸞收桃李新陰在鯉庭之句

居易錄卷三十一終

居易錄卷三十二

濟南 王士禛 著

康熙三十九年庚辰正月門人李御史子來先復攜示

李在換鸞圖筆意疎放圖中一丈夫相向坐右軍座

後一女子捧硯立對坐一丈夫回顧童子抱鸞至鸞

宛頸似欲鳴者意態生動衣褶飄灑按圖繪寶鑑李

在字以政莆田人遷雲南山水細潤宗郭熙豪放宗

夏圭馬遠其人物評者謂八面生動故四方重之云

又元磁椀一視今磁絕厚素質青花花紋皆作盤螭

形云是曹縣李襄敏公秉家物自元時先世所傳至

襄敏已數世今又三百年矣

正月二十七日

乾清門

御試已卯科順天舉

人四書題三道內閣九卿在懋勤殿閱卷四鼓始出宿館中次日仍召小九卿科道官覆閱

二十九日

駕出由天津水路閱永定河工

二月初三日有

旨欽定覆試順天舉人一等至

三等俱准會試四等革黜者七人

初五日吏部集議順天考試官同考試官衆問或以磨勘疏爲主或以覆試爲主予謂准舉人會試者

皇上之特恩磨勘處分者科場之定例若因覆試

而廢磨勘恐將來科場之弊益不可問矣滿洲太宰庫勒納公深以予言爲然議遂定

黃石齋先生蔡夫人名潤石字玉卿工書法與先生逼似康熙庚辰春得其楷書律詩一卷楷法稍雜分隸題云偶寄夏太守時山中聞警崇禎丙子秋八月蔡氏玉卿書於石養山中時多崇禎中魔道語蓋先生作也

庚辰科會試總裁大學士叅刑部尚書吳興大學士兼吏部尚書熊賜履戶部右侍郎李枏都察院僉都御史王九齡熊自癸丑至甲戌丁丑今庚辰凡四典

禮闈向所未有也僉憲舊不列名聞自丁丑科始  
唐樂府往往節取當時詩人之作率緣情切事可以  
意會理解然亦有不可解者如陸州歌第一分野中  
峯變乃節王右丞終南山詩後四句涼州歌第三關  
篋淚沾臆乃節高常侍歌詩前四句也不知與邊塞  
閨情何涉而取之

經筵講官例以尚書侍郎及內閣學士翰林院掌院

學士充大拜者則解講官惟徐崑山立齋元文以戶部

入相仍掌翰林院事兼經筵講官已卯十一月熊孝

感青岳賜履以吏書張桐城敦復英以禮書同日大拜

皆帶經筵講官蓋三臣在經筵最久故用異數非故  
事也

三月初一日午時 文華殿經筵滿講官吏部尚書

庫勒納刑部尚書傅臘塔禮部右侍郎努赫刑部右

侍郎常綬工部左侍郎羅察內閣學士兼禮部侍郎

布泰翰林院掌院學士兼禮部侍郎阿山漢講官東

閣大學士兼吏部尚書熊賜履文華殿大學士兼禮

部尚書張英吏部尚書陳廷敬戶部尚書李振裕禮

部尚書杜臻刑部尚書王士禎禮部左侍郎王封燊

大學士英尚書庫勒納講論語子以四教一節尚書



廷敬侍郎阿山講禹貢禹敷土隨山刊木三句講畢  
賜宴太和門

祝希哲書評云孟頫雖媚猶可言也其似算子率俗  
書不可言也王元美云李北海傷佻然自雅趙松雪  
稍穩然遜俗又云承旨精工之內時有俗筆予謂松  
雪詩亦有法所患未能免俗耳

聞會試外簾諸公說二月某日貢院中忽聞小兒啼  
聲跡之在明遠樓上登樓視之果有一小兒如初生  
者卧而啼哭莫知所從來亦異事也

宋牧仲

榮

中丞寄所刻施注蘇文忠公詩集四十三

卷宋司諫吳興施元之德初與吳郡顧禧景繁同撰  
元之子宿字武子增補見陸游渭南集此書牧仲得  
之吳中藏書家闕十二卷牧仲偕幕中文士某某共  
爲補之始爲完書

唐黃御史滔刻集八卷賦一卷詩三卷碑誌記序牋  
啓雜文四卷附錄一卷首有楊誠齋洪容齋二序淳  
熙四年渝州謝諤序唐藝文志云黃滔集十五卷又  
泉山秀句三十卷此集初名東家編略宋紹興丙子  
尚書考功員外郎黃公度撰誌滔之八世孫也

初十日午時

東宮會講持敬殿

東宮講官

內閣學士兼詹事府詹事特默德翰林院侍讀汪灝  
講中庸誠之者擇善而固執之者也二句詹事府少  
詹事巢可託翰林院修撰胡任輿講仲虺之誥以義  
制事以禮制心二句講畢 賜茶文華殿門  
振武將軍涼州提督總兵官孫思克卒年七十四思  
克旗下人鎮西陲三十八年兵畏民懷番徇戴之如  
父母王輔臣噶爾丹之亂兩次用兵恢復征勦累立  
大功 本朝名將也屢以老病疏乞骸骨 上溫  
諭慰畱不允至是卒奉 旨從優議恤贈太子少  
保加太子太保諡襄武

總督河道兵部尚書于成龍卒奉 旨從優議恤  
諡改江南江西總督兵部尚書張鵬翮爲河道總督  
徐昌國談藝錄云未睹鈞天之美則北里爲工不詠  
關雎之亂則桑中爲雋當是旣見空同之後深悔其  
吳歛耳而牧翁顧力揚其少作正弇州所云舞陽絳  
灌旣貴後稱其屠狗吹簫以爲佳事寧不泚頰者也  
石守道作怪論三篇毀楊文公予嘗駁之矣又讀其  
救說一首最諄于理如云漢祚微王莽篡道大壞楊  
雄存之五代之亂馮瀛王存之數語盡世道人心不  
淺而篇終又云天下國家有難患以死殉之忠臣之

節云何又自相矛盾之甚守道持論率僻謬如此

南海舉人歐之麟貽其從世祖禎伯虞部集若干卷

後附禎伯青衣李英詩曰歷遊集餐霞集當壚集又

贈言一卷則徐子與沈蛟門文五峯諸人之作皆在

子與極稱英咏月五言絕句云予尤喜其臯蘭觀獵

七言云白草黃沙羽獵齊將軍鏖戰馬頻嘶籌邊已

斷匈奴臂百萬蒐田大夏西頗見格調顧氏國雅集

登其人非過也

唐詩人以畫名家者首薛稷王右丞次鄭虔顧况張

志和張謹劉商圖繪寶鑑云劉方平工山水樹石汧

國公李勉甚重之又李林甫善山水類昭道昭道思

訓之子林甫思誨子蓋從兄弟也 人知滕王元嬰

善作蜂蝶不知嗣滕王湛然亦善畫花鳥蜂蝶官至

太子詹事 吳越王錢鏐善墨竹

都察院同官題名 康熙三十七年七月予自戶部左侍郎遷都察院掌院左都御史

滿左都御史哈雅爾圖 由兵部右侍郎陞改包衣昂邦三十八年十一月再補左都御史

左都御史馬爾漢 由兵部左侍郎陞調補兵部尚書

左副都御史額倫特 由通政使陞

左副都御史壽鼎 由內閣學士改

漢左副都御史錢三錫 太倉人由宗人府丞陞遷戶部右侍郎卒

左副都御史金璽

旗人由宗人府丞  
陞遷偏沅巡撫

左副都御史吳涵

石門人由太僕寺卿  
陞遷工部右侍郎

左副都御史梅鎬

宣城人由宗人府  
丞陞遷福建巡撫

左副都御史王紳

雖州人由大理寺  
卿陞遷戶部侍郎

左僉都御史王紳

由大理寺少卿  
陞遷大理寺卿

左僉都御史王九

華亭人由少詹事  
陞遷內閣學士

刑部同官題名

康熙三十八年十一月  
左都御史調補刑部尚書

滿尚書傅臘塔

由左都御  
史調補

尚書安布祿

由左都御  
史調補

左侍郎綬色

由內閣  
學士陞

左侍郎蘇赫納

由內閣  
學士陞

右侍郎吳赫

由川陝總督調補改  
工部右侍郎尋革

右侍郎常綬

由工部左侍郎調  
補管右侍郎事

右侍郎舒輅

由工部侍  
郎調補

漢左侍郎徐湖

錢塘人由工部侍郎  
調補遷河南巡撫

右侍郎李輝祖

旗人由湖廣總  
督調補尋革

右侍郎喻成龍

旗人由兵部督捕侍郎調補添註尋  
題明即補李輝祖之缺遷安徽巡撫

左侍郎卞永譽

旗人由福建  
巡撫調補

右侍郎吳涵

石門人由工部侍郎  
調補遷吏部侍郎

右侍郎金璽

旗人由偏沅  
巡撫調補

畫家有兩李營丘北宋李成人皆知之南宋李永亦稱營丘知之者殊少太原王穉登云李營丘以山水擅名爲宋畫院第一謂永也

三月二十日策試中式舉人王露等三百五人二十一日上御太和殿臚傳第一甲第一名汪繹江

南常熟人

丁丑會試  
第二人

第二名季愈江南寶應人

庚辰會試  
第二人

第三

名王露

唐會

二甲一名張成遇番禺人

長安薦福寺僧行義予遊秦時識之近謁普陀山歸見過云與雲水僧七人雨中炷香潮音洞虔禱願覩大士慈容倏見洞中現五色光光中有大士立像旁

有白鸚鵡像莊嚴妙好是女人身他僧見者種種不一久之乃沒又云法華洞爲大士演法處有老僧智玉居之年百有二十歲本明邊將也落伽山有老尼相傳百六七十歲獨居是山無伴侶弟子距普陀尚百里寺僧往致供給有見之者寺有玉印佩之可以辟邪已疾菽園雜記以爲普陀梵語白也落伽華也以山多山礬花故名本一山也

吳郡故孝廉徐昭法枋卒貧不能葬一日有武林高士某者來弔自任窀穸然其人亦貧而特工分隸乃賃居郡中醫書以龙葬具幅直一金吳人高其誼爭

售之得數十金遂卜日以葬而以羨歸其子爲饘粥  
費語之曰吾欲稱貸富人懼先生吐之故寧勞吾腕  
知先生所心許也惜不得其名氏

近于刑部案牘中又得數異姓薛獎蹤遠奉尋偃布  
職慈流力學貌稀又天順甲申進士直茂音陝英宗  
命改姓陝字

禮部考核各省學道奉

旨停止內陞著爲例

近科鼎甲未有如癸丑之盛者狀元韓少宰葵榜眼  
王大司空鴻緒探花徐詹學秉義同時在 朝位三  
品上徐尋遷禮吏二部侍郎

鼎甲之衰未有如丁丑者庚辰春尚未解館而狀元  
李修撰蟠以科場事流徙奉天府安插探花姜編修  
宸英卒于非所榜眼嚴編修虞惇以子弟中式牽連  
降謫

裴秀冀州記云王僑犍爲武陽人爲柏人令于緱氏  
山登仙按今唐山縣卽漢之柏人嶧嵒山在其城北  
故馬彘贈韓定辭詩云別後嶧嵒山上望羨君時復  
見王喬後漢書王喬河東人顯宗時爲葉令或云卽  
古仙人王子喬

天上人予曾兩記之近觀田藝蘅畱青日札云巳卯

曾都御史在南京見雲中二人冉冉直下僅相去七八尺信陽蔡夢官云巳卯十一月二十五日自徐回潁川午後見天上西北白雲一條如路上行者七人有唐巾者科頭者長衣者兩截者手中各有所執亦有背負者往東南去可十里入山而滅見者六七十人予亦曾見三人一全體二半坐云

馮開之先生

夢禎

快雪堂集頗得禪悅山水之趣予少

時極喜之武林孝廉馮念祖字文子先生曾孫也執經于予一日請集序予問之曰初刻此集成僅摹印三十部板尋燬于火故流通絕少欲以頻年館穀所

入重鑊之梓予嘉其志匆匆數年未有以報聊記于此

東坡居士在儋耳作十八大阿羅漢頌予最愛其二

頌第九尊者

云飯食已畢撲鉢而坐童子茗供發籥吹火我

作佛事淵乎妙哉空山無人水流花開

第十六尊者

云盆花

浮紅篆煙繚青無問無答如意自橫點瑟既希昭琴不鼓此間有曲可歌可舞此頌真契拈花微笑之妙

者又一頌

第十五尊者

云薪水井臼老矣不能摧伏魔軍不

戰而勝得非自寓之詞耶

吾鄉益都孫文定公

廷銓

順治十八年以吏部尚書乞

假歸省途中作北曲

歸田

有句云閃煞人旌門畫戟虎

頭牌喜煞人神錢花鼓牛王廟又有北曲

自笑

云把一

箇洛陽街花攢錦簇美前程生扭做望江亭風清月  
冷喬丰韻甚得元人遺意

古云太子處則監國出則撫軍撫軍二字乃儲貳之  
稱今人謂巡撫爲撫軍沿襲之久莫知其非不典甚  
矣

浙之石門有語兒亭

國語曰  
禦兒

野史謂勾踐使范蠡獻西

施于夫差三年始達于吳至此亭生一子因名語兒  
亭夫當君臣卧薪嘗膽之日而范蠡乃以兒女子之

情道路野合不忠甚矣何以爲霸佐聲施至今且吳  
越相隔一江信使頻數三年始達勾踐豈土木偶耶  
乃聽其淹畱鄰國置若罔聞俗語不實流爲丹青可  
爲嗚噓

門人黃郎中元治字自先常兩官滇黔云浪穹縣平  
遠州皆有鳳凰山每至某月日輒有衆鳥千百其羣  
集于山上毛羽形狀多不可名按一統志浪穹山初  
名羅浮蒙氏細奴羅興時鳳翔于此改名鳳羽及鳳  
死每歲冬衆鳥哀弔其上故又名鳥弔山

董卓吳元濟黃巢三祠前記之矣近讀蕭山來元成



集之樵書

明崇禎庚辰進士其子  
燕雯今年庚辰進士

所載古今淫祠會稽舊記

秦始皇與大禹同廟王朗爲會稽太守除之見三國志注宋孝宗乾道四年加封楚州顯濟廟靈威王乃吳主孫皓祠以汪大猷等使北邊言其威靈故封又蔡人歲時祀吳元濟王質知蔡州毀之更祀狄仁傑李愬見宋史常山郡有董卓祠祠有栢樹魏蘭根盡伐以爲櫛材見北齊書予按唐高常侍適有後漢賊臣董卓廟議云狄道之人不慙卓之不臣而務其爲鬼則漢莽可得而神晉敦可得而廟桓溫父子可享于江鄉爾朱兄弟可祠于塞上云則是卓祠常山狄

道兩地皆有之矣樵書又載杭州有秦檜祠朗州有梁松祠名陽山廟見調言長語鄴有石虎廟見南史華容有朱太尉祠云是朱泚見耳談予按湖南祀泚事尤不經恐有訛誤又無爲州有曹操廟和州亦有魏武祠見劉禹錫詩及一統志又澧州有驩兜廟石室存焉又某郡有盜跖廟

月之御曰望舒又曰纖阿又扶支國有望舒草紅色其葉如荷月出則舒月沒則卷或卽所謂夜舒荷也二說不同

世說林公道王中郎

文

云著膩顏恰翰布單衣挾左

傳逐鄭康成車後云按魏造白恰橫縫其前後名之曰顏恰永嘉間稍去其縫名無顏恰也

四月初十日

命下丁丑科庶吉士徐樹本

故大學士元文子

等二十五人俱授翰林院編修檢討朱啓昆等六人仍畱館教習

已卯福建解元張遠字超然舊交也今為予門人翰林檢討阿金工部主事潘鵬雲所取士言西山廣泉寺有老僧不求食予人不出山者數十年矣日唯采如意草食之草不知所從來唯此僧種之其葉光澤而味甘美云聞諸馮補之補之名行賢常熟人亦交

予予能詩工書予二十年前曾選定其詩云

康熙甲子溧陽西塘里人夜見田間有光遂掘土數

尺得古銅器一具中貯大黃布刀百餘紅綠斑駁真

漢時物其形製與宣和博古圖所載漢盃同今歸門

人狄庶常億

字立人

麋牀者後漢書冉駹夷出麋異物志麋似鹿角觸向前皮可作履襪角正四據南人因以為牀字書前西切音齊

四月改翰林院編修檢討為科道官馮雲驩湯右曾俱給事中彭始搏宋朝楠劉灝張瑗俱監察御史

本朝鼎甲之盛無如蘇州蘇州之盛又以長洲常熟  
二縣爲最長洲狀元四人康熙丁未繆侍講形癸丑  
韓少宰莢丙辰彭侍講定求乙丑陸侍講肯堂韓以  
下三人又皆兼會狀兩元常熟狀元三人順治戊戌  
孫承恩康熙己未歸少詹允肅今科庚辰汪修撰繹  
他若湖州之德清兩狀元皆蔡氏康熙庚戌啓傅壬  
戌升元叔姪也又皆成科大奇

江北數省鼎甲甚少惟直隸滄州二榜眼順治丙戌  
呂讀學纘祖乙未戴叅議王綸河南柘城一榜眼康  
熙甲辰李少司空元振一探花今科庚辰王編修露

吾鄉艾大司寇

元徵

爲總憲時疏請禁言官風聞言事

違者降罰人或咎之近遂有疏請復風聞之例者然  
不知乃唐武氏所創非故事也唐史武后以術制羣  
下諫官御史得以風聞言事自御史大夫至監察御  
史皆得互相彈劾率以險詖相傾此風聞言事之始  
蓋羅織告密之別名耳偶讀東阿于文定公筆塵載  
此一則錄之當知請禁之非過而請復者之失考也  
唐咸通五年彗星見長三尺司天奏以爲含譽瑞星  
宣示中外近年彗星見粘給事中本盛亦上言以爲  
含譽星其言本此也抑暗合耶粘字質公閩人

本朝內閣各部院府寺皆設滿洲漢軍筆帖式主翻譯文書或七品或八品內而閣部外而督撫以下率自筆帖式起家于文定公筆塵載元朝丞相謂之大必闕赤蓋主文字之稱此猶謁者僕射之名始于秦而六朝以來遂爲宰相之稱耳

秦置御史大夫以貳丞相漢沿其制丞相缺則御史大夫以次遷卽今都察院左都御史也副都御史乃漢之御史中丞今人不知多稱總憲爲中丞殊可笑筆塵亦言之蓋自明已誤矣

海寧陸冰修嘉淑浙西名宿也康熙己未庚申間客

京師每與宣城施愚山侍講梅耦長庚毘陵邵子湘長蘅夜過予邸舍劇談至三鼓始各散去陸有詩紀事云科靴到門衣不船船襟紐也或以杜子美飲中八仙歌天子呼來不上船亦作此解謬甚菽園雜記已言之矣

四月十六日

駕謁

孝陵視永定河工

從叔祖考功郎中季木

象春

常得寶刀映日光成五色

吹毛立斷上有十四字類蝌蚪文譯之云掃電流虹拜帝朝啓疆正號識長武裕州吳平子阿衡以四良馬易之吳官至總督薊遼都御史

戶部主事孔尚任東塘有龍卵聯句云燕市得一卵  
其堅如石圓尺有三寸鵝子形色類漬象牙徧體鰲  
點有紋蟠結如蛟螭狀古云龍蛇卵有鰲點蛇圓龍  
長龍卵經火不燬試之良然

天祿辟邪皆獸名一角曰天祿兩角曰辟邪總謂之  
桃祓或琢玉肖其形陸文量菽園雜記載奉天門常  
朝御座後內官持一小扇金黃絹裹之名卓影辟邪  
永樂中外國所進但聞其名不知何物也

今諸衙門滿漢設官略同其同而異者如詹事府滿  
洲掌詹以下皆不兼翰林院銜左右春坊司經局銜

上皆冠以詹事府十三道監察御史皆冠以都察院  
而不分某某道是也

天下佛寺之名率用梵典予所經歷其名有新異者  
如蜀重慶府有相思寺青州府沂水縣有花之寺相  
思者以寺產相思竹得名花之二字不可解周侍郎  
櫟園亮詩云月明蕭寺夢花之其長子在浚字雪客  
予門生也遂取二字以名其詞太好奇矣潛山道中  
有釣魚寺則因河上有釣魚臺而稱之未必是寺本  
名也

明初選進士爲庶吉士分置近侍諸署若解縉爲中

書庶吉士是也右見菽園雜記予池北偶談嘗記六科庶吉士初未詳官制如何觀此乃曉然蓋中書六科皆近侍也

煙蘿子晉天福間人居王屋山佃陽臺宮田積功行一日于山中得異參闔家食之拔宅上昇今山有煙蘿子祠見李川父遊王屋山記

菽園雜記載蘇州志云菘菜北方種之一年半爲蕪菁二年菘種都絕猶橘之變于淮北云此說大謬今京師以安肅白菜爲珍品其肥美香嫩南方士大夫以爲渡江所無不知蘇志何據云然豈南北地氣遽

反易有如此耶按先大父方伯贈司徒公羣芳譜蔬部云白菜一名菘燕趙維揚所種最肥大而厚一本有重十餘斤者益可證蘇志之妄

五月初一日 命九卿舉司道可內陞京卿者予舉湖廣武昌道叅議莊摺摺江南武進人康熙庚戌科進士尋陞通叅莊亦不知爲予所薦也

舊說江以南無蝗螻近時始有之俗祀南宋劉漫塘宰爲蝗神劉金壇人有專祠往祀之則蝗不爲災俗呼莽將殊爲不經按趙樞密蔡作漫塘集序稱其學術本伊雜文藝過漢唐不知身後何以矯誣如此亦

如江湖間祀張睢陽作青面鬼之類也

山東巡撫王國昌題爲援例陳請等事該臣看得奉文行查端木謙閔煌是否先賢端木子閔子嫡派保送一案據布政使劉暄詳稱衍聖公孔毓圻咨併據兗州府覆稱閔煌端木謙俱係先賢後裔據濬縣以端木子墓祠載在縣誌其後裔端木謙春秋祭祀由來已久確係嫡派出結保送據濟寧州以閔煌自魯遷歛自歛遷濟世爲主祀其兄閔焯修理祠基招佃祭田有據今閔煌又以兄子閔衍籀乃係宗子請以衍籀承襲出結保送臣謹會同衍聖公臣孔毓圻合

詞具題伏祈

敕部議覆施行奉

旨下九卿

集議端木子七十代孫端木謙閔子六十七代孫閔衍籀俱准給世襲五經博士

予嘗謂時人好私其鄉人前輩而不顧天下後世之公議如秦人之於張尚書綵吳人之於陸尚書完楚人之於張相國居正是已然未有如艾南英之於嚴相嵩者閱其題弇州四部稿後論嘉靖事至以爲才相英君千秋知遇雖誅戮稍稍過當云如南英之言則楊忠愍夏忠愍諸公之死皆宜而嵩不當與宋之惇布京檜同列奸臣傳矣南英負文名愚而諄乃至

此不亦怪哉

五月初六日

御乾清門選庚辰科進士張成遇

東人

等四十三人為庶吉士

陝西巡撫兵部侍郎兼副都御史貝和訥為四川

巡撫以內閣學士兼禮部侍郎華顯為甘肅巡撫

于養志革職甘肅巡撫喀拜丁憂

黃山谷題畫云烈風偃草木客子當藏舟入浦激中

強人力牽挽欲何之耶數語見道之言極有味然蘇

之貶惠貶儋黃之貶戎貶宜皆似未解此者何也豈

亦能言之而不能行耶

康熙庚辰庶吉士李薛河南夏邑人其前身武進薛

案諧孟也薛明崇禎進士官歸德知府有善政卒後

人傳為歸德府城隍之神一日李叟夢神人裝冠章

服至其家曰我薛某也上帝命為汝子寤而薛生因

以名之仍以諧孟為字

江鄰幾雜志載宋時一郊費六百萬後至一千餘萬

今每歲南北郊 駕必親祭亦無冗費而昭事之

誠通于神祇最得禮意不知宋時何以所費不訾乃

爾

直省各巡撫共議裁官三百三十六員內直隸井陘



道口北道二員山東青州道一員浙江金衢嚴道一員陝西神木道一員福建督糧道一員奉旨口北神木二道仍畱不裁允漢軍御史郭金城之請也以禮部侍郎掌翰林院事阿山爲江南江西總督改兵部右侍郎兼都察院副都御史

甘肅巡撫喀拜起復在任守制調華顯爲陝西巡撫近代李贄稱武聖馮道足覬其心術古人亦有類此者如下謂以曹操司馬懿爲聖人夏竦美李林甫相業之類

江休復云朱審刑奏案貼黃更加撮白撮白上復有

貼黃不知撮白是何許語

司馬溫公言王右丞詩崇梵僧初謂是僧名乃寺名近東阿覆釜村名見鄰幾雜志然覆釜自是山名司馬公不知何據

雜志云白水縣堯山掘得誌石是員半千墓云十八代祖凝本劉氏彭城人自梁入魏以其雅正似伍員遂賜姓員此說亦奇按半千全節人卽吾郡之平陵故城也何以葬白水未及考

康熙三十九年間北城民徐起龍有女嫁馮繼隆甫數日其姑曹氏淫悍婦人也引所私辛二僧宣召等

逼姦之女不從則加炮烙畏而從之既兩月始許歸  
寧女泣訴父母起龍羞憤偕其表弟侯六登曹氏之  
門欲毆之曹及其姦夫辛二出禦遂鳴于官解赴刑  
部余適爲尚書司讞訖呈堂以起龍兄弟白晝打搶  
草率結案余先已訪得其情實見有二人銀錙繫頸  
問之云徐起龍侯六余大怒碎其牘擲地詰滿漢司  
官曰汝曹畏勢乎徇情乎抑納賄乎如此爰書乃敢  
誣我天地神明其可欺耶立令釋二人銀錙繫曹氏  
辛二之頸而令嚴提宣召到案辛二囊三木曹氏拶  
指皆吐實宣召至亦具伏遂按律定擬而斷女離異

歸父母都人皆以爲快庚辰五月事也

汪主事蛟門嘗謂淮南一士夫云家鮮詩書之氣門  
無貧賤之交其累世富貴宜矣

康熙三十八年青州議修葺府學青屬十四州縣分  
任之而總司于府學訓某某多侵漁木石久不訖工  
一日忽得狂疾搏顙大呼子路擊之跪拜祈哀號呼  
宛轉數日竟死

明永樂中忽有玉鴿十二枚從南飛來集天壽山後  
于其地下長陵至德陵凡十二陵而止景帝別葬金  
山思宗則渴葬田妃墓而已

江蘇巡撫宋犖疏稱江寧縣故民林起龍妻黃氏內則克嫻婦道無忝于歸八十九載現年百有二歲所當題請旌揚以昭人瑞事下禮部

五月禮部尚書杜臻上疏乞休

溫旨以原官致

仕

時年六十七

命翰林掌院學士法良韓葵教習庶吉士

以都察院左都御史王澤弘爲禮部尚書擢戶部右侍郎李枏爲左都御史副都御史王紳爲戶部右侍郎順天府府尹甘國樞爲副都御史

居易錄卷三十二終

居易錄卷三十三

濟南 王士禎 著

六月十七日

御試翰詹諸臣于 暢春苑自正

詹事徐秉義以下八十七人題爲 萬壽無疆賦擬

御製仍以題中五字爲韻秉義第一 賜宴又

賜 御筆擢秀清流四大字少詹以下皆有賜惟不合式者滿漢二十人不與

定例凡旗人得罪其主主人以喫酒行兇呈部部不取供卽移送戶部發黑龍江將軍分與新滿洲披甲之人爲奴行之旣久遂多冤抑一日滿主事索善審

得某案非惟行兇無據卽買契亦屬偽造斷出爲民  
予深獎之遂堂諭十五司以後須詳究真情必有行  
兇實據乃坐不得朦混一槩行遣以防霸佔妻女等  
弊或有不悅者不恤也

六月二十八日

特賜刑部尚書

臣

王士禛帶經

堂

御書扁額令中官送大學士張英處轉頒

臣

寓二十九日五鼓赴

暢春苑謝

恩是日候補

掌印給事中王原祁恭進元人畫二軸自畫山水軸

二卷二素扇十柄賜

御書一幅先是

賜吏

部尚書陳廷敬典翰堂額禮部尚書王澤弘夙夜惟

寅左都御史李枏臺閣生風各四大字戶部尚書李

振裕臨唐詩一幅

賜國子祭酒孫岳頒

御書筆端垂露四大字仍

命蘇州織造工部爲置田宅異數也

棲霞楚雲禪師者名興源天界浪杖人之孫竺菴成  
公法嗣也康熙癸酉曾訪予于京師庚辰自建昌之  
壽昌返棲霞復來京師過訪云將歸老南嶽且云居  
士大名今日歐蘇也吾住江西三年又嘗往閩中博  
山東苑二祖庭掃塔凡深山窮谷漁樵耕牧之徒無  
人不知居士名者此何故也予謝之云歐蘇之喻某

不敢當然昔人相承叔云耳白于面名滿天下唇不掩齒動而得謗名亦隨之某生平涉世殆與此數語昭合似是本命于支合如此耳

庚辰六月總督河道尚書張鵬翮疏報海口疏通河流直下請建祠廟仍賜名大通口

以內閣學士胡會恩爲兵部右侍郎

兵部右侍郎  
檄曾掣卒官

僉都御

史王九齡爲內閣學士兼禮部侍郎

以太僕寺卿錢晉錫爲順天府府尹

上諭翰林院官員內有甚貧者作何施恩并給假回籍不能來京者該地方督撫酌量料理送京之處內

閣翰林院會議具奏

唐人章八元題慈恩寺塔詩云迴梯暗踏如穿洞絕

頂初攀似出籠但鄙極矣乃元白激贊之不容口且

曰不意嚴維出此弟子論詩至此亦一劫也盛唐諸

大家有同登慈恩寺塔詩如杜工部云七星在北戶

河漢聲西流又秦山忽破碎涇渭不可求俯視但一

氣焉能辨皇州高常侍云秋風昨夜至秦塞多清曠

千里何蒼蒼五陵鬱相望岑嘉州云下窺指高鳥俯

聽聞驚風又秋色從西來蒼然滿關中五陵北原上

萬古青濛濛已上數公如大將旗鼓相當皆萬人敵

視八元詩真鬼窟中作活計殆奴僕僮隸之不如矣  
元白豈未覩此耶

詹事兼侍讀學士徐秉義祭酒孫岳頌俱授禮部侍郎仍掌詹事府國子監事

順天府尹缺吏部列應陞正陪太僕寺卿錢晉錫光祿寺卿江縈名上令內閣傳諭九卿各舉所知

衆相顧未發予曰凡科道吏部及監司內陞者皆經皇上鑒拔其品其才上所稔知九卿所舉

未必能如 睿裁之真確翻恐挂一漏萬且如太僕光祿皆有職掌事務煩劇今之府尹與古之京兆

事體不同號爲閑曹未有可爲太僕光祿列卿而不能勝京尹之任者也皆躉予言遂罷舉仍以前二君及大四品左右通政大理寺少卿名列上 上竟用錢爲府尹而擢左通政勞之辨爲太僕卿人皆服其至公

七月二十四日與諸公內直 賜御書唐詩湘竹

金扇其一面畫人物山水花鳥 臣得人物其詩乃主

人能政訟庭閑 云未題臨董二字小 御印引首

曰中和後曰康熙宸翰

內大臣阿爾迪謚勤僖 康熙三十五年八月二十

八日

浙江溫州總兵官左都督一等阿達哈哈番贈 太子少保蔣懋勳諡襄僖 康熙三十六年二月初四日

領侍衛內大臣議政大臣佐領蘇爾達諡恪僖 康

熙三十六年 月 日

鎮守杭州將軍一等阿達哈哈番札木陽諡敏恪

康熙三十八年十月二十日

予嘗言詩小序授受有據而不可廢紫陽集傳臆斷而不可憑適讀黃省曾五岳集孔子春秋序云欲聞

京都之事者遠而四裔孰若中州中州孰若畿輔畿輔孰若左右之人今之人四裔類也漢氏諸名家中州類也戰國齊魯諸生畿輔類也左氏公穀左右類也三傳之旨後之人安得超駕企並之耶此喻極快明乎三傳則可知小序之不可廢矣

今京師臘月卽賣牡丹梅花緋桃探春諸花皆貯暖室以火烘之所謂堂花又名唐花是也按漢書召信臣傳信臣爲少府大官園種冬生葱韭菜茹覆以屋廡晝夜難蘊火待溫氣乃生唐人詩內園分得溫湯水二月中旬已進瓜蓋漢唐以來皆然

庚辰九月七日門人寧波府同知靳熊封治荆以公  
務入都貽予鈔本說部書數種有金元遺山續夷堅  
志舊所未睹也內記二事一曰劉太博機貞祐亂後  
遷濟州刺史時民居官舍皆被焚復立州宅掘地得  
古墓乃唐一行禪師墓有石記云劉機當破吾墓一  
曰石守道墓在奉符太和中墓崩諸孫具棺葬骸骨  
獨其心如合兩手已化爲石

又記二事云安常字順之從党承旨學大篆多識古  
文奇字太和末曾見內府所藏湯盤作白玉方斗近  
四寸底銘九字卽德日新日日新又日新也又一方

鼎耳二足四饗饗象在雷文中銘云魯公作文王尊  
彝瑩如碧玉無復銅性矣

庚辰七月六日夜三更後淮安洪澤湖大風雨雷電  
發屋拔樹時督高堰堤工大臣如吏侍王顥菴揆戶

侍田蒙齋雯王公垂紳諸公及分修督撫諸公皆在

避匿岸下土穴中質明望見空中十二龍鬪色皆青  
鱗鬣畢現至七夕入夜始罷

九月有旨河工責任宜專其差督河工兵部尚  
書范承勳等九臣皆撤回京

十二日車駕還宮



旨停三十九年秋決其緩決矜疑者仍令具

奏以下二條

皆九月十五日

行取知縣止以河道總督張鵬翮直隸巡撫李光地

保薦者八人為科道官餘皆以部屬用

蠡縣知縣左必蕃良鄉傅作楫靈壽李發

甲滿城朱元春滋陽方永澄汾西靳讓善化梁任南鄭魏壽期

上駕經寶坻欲

親臨奠故大學士杜立德墓其

予刑部郎中某懇辭乃

御書永懷惟舊四大字

賜之

以少詹事曹鑑倫為內閣學士兼禮部侍郎

改刑部左侍郎徐潮為兵部右侍郎兼副都御史巡

撫河南河南巡撫李國亮罷

以大理寺少卿王材任為都察院左僉都御史

禮部尚書澤弘

次

二十二日辰時 文華殿經筵講官東閣大學士吏

部尚書熊賜履文華殿大學士禮部尚書張英吏部

尚書陳廷敬戶部尚書李振裕刑部尚書王士禎吏

部右侍郎兼翰林院學士韓荃禮部左侍郎兼翰林

院學士王封滌禮部右侍郎三寶刑部右侍郎常綬

工部左侍郎羅察掌翰林院學士兼禮部侍郎法良

待大學士賜履侍郎常綬進講中庸仲尼祖述堯舜

一節大學士英學士法良進講易恒卦聖人久於其道而天下化成一句講畢 賜宴 太和殿前  
二十二日武會試揭榜會元周卜昌湖廣夔陵州人  
中式凡一百名

以前福建巡撫卞永譽為刑部右侍郎

喻成龍轉左侍郎

元遺山續夷堅志記平陽有賈叟者無目而能刻佛像交城一寺中佛是其所刻相好端嚴初立木胎先以手摸索之意有所會運斤如風又趙州警僧能喫墨作畫上布五色亦喫之毛提舉家一虎蹲大樹下  
臥一青彪虎目爍爍如金望之毛髮森豎雖趙邈

不能過也殆佛氏所謂六根互用者耶

德州馮舍人廷樾字大木予同年之子也中康熙壬戌進士詩名書法擅絕一時庚辰秋九月十六之夕尚與客談讌中夜忽中煤炭毒以卒質明僕輩始知之蓋京師煤炭皆有毒惟室中貯水盆盎中毒即解又續夷堅志云河中人趙才卿言煤炭熏人往往致死臨臥削蘆葍一片著火中即烟不能毒人如無蘆葍之時預乾為末用之亦佳

阿魏散治骨蒸傳尸勞寒熱羸弱喘嗽方亦載續夷堅志阿魏三錢研青蒿一握細切向東桃枝一握細

劉甘草如病人中指許大男左女右童便二升半先以童便隔夜浸藥明早煎一大升空心溫服服時分爲三二次服調檳榔末三錢如人行十里許時再一服丈夫病用婦人煎婦人病丈夫煎合藥時忌孝子孕婦病人及腥穢之物勿令雞犬見服藥後忌油膩濕麪諸冷硬食物服一二劑卽吐出蟲或泄瀉更不須服餘藥若未吐利卽當盡服之或吐或利出蟲皆如人髮馬尾之狀病卽瘥又云此方得自神授隨手取效陵川進士劉俞字彬叔傳吐利後虛羸魂魄不安以茯苓湯補之白茯苓茯苓神各一錢人參三錢遠

志去心三錢龍骨二錢防風二錢甘草三錢麥門冬去心四錢犀角五錢剉爲末生乾地黃四錢大棗七枚水二大升煎作八分分三服溫下如人行五里許時更一服謹避風寒若未安隔日再作一劑已上方須連服之

又云治發背腦疽一切惡瘡初起時採獨科蒼耳一根連葉帶子細剉不見鐵器用砂鍋熬水二大碗熬及一碗如瘡在上飯後徐徐服吐出吐定再服以盡爲度如瘡在下空心服瘡自破出膿以膏藥傅之京兆張伯玉榜示傳人後昆仲皆登第 又治一切惡

瘡服瓜萋方懸萋一枚去皮用穰及子生薑四兩甘  
草二兩橫細切用白灰酒一碗煎及半濃服之前煎時  
不見銅鐵患在上食後服在下空心服亦見續夷堅  
志又云張戶部林卿說有加大黃或木香或乳香沒  
藥者病瘡先疏利次用瓜萋方日以乳香菜豆粉温  
下三五錢防毒氣入腹外以膏塗傅之自無不愈  
十月初三日 皇太后六十大壽大學士尚書人  
進緞八疋侍郎學士副都御史通政使大理卿宗人  
府丞人進緞六疋止各收其一 諸王進馬鞍皆冊  
瑪瑙諸寶飾之璀璨奪目

初四日 太和殿試庚辰科武進士周卜昌等一百  
人士禎以刑部尚書與讀卷是晚閱卷六十初五日  
晨同部院啓 奏畢與大學士馬公熊公張公左都  
御史李公禮部右侍郎李公錄等趨往紫觀閣候  
駕觀馬射 上登舟至行殿 御弓矢親射

諸皇子宗室及侍衛以次射畢始試進士讀卷官  
侍坐終日試畢 上復 御弓矢如前射畢隨

駕入晚閱四十卷初六日啓 奏畢復趨 行

殿候 駕觀步射 駕至 御弓矢如前射

畢 上親選十三人既而止畱八人至暮復

御弓矢隨

駕入卽同諸臣賁

殿試卷至

乾

清宮

上乘燭御西暖閣欽定第一甲三名二甲

前五名以是科進士多嫻騎射

特諭二甲取四

十二名與三甲等異數也是日垂問臣士禎年齒科

分甚悉又

命取西洋近視眼鏡令試之歸館已

及二更初七日啓

奏畢出至

太和殿前更朝服

候臚傳一甲狀元馬會伯寧夏衛人榜眼林濬江寧

縣人探花朱士植靈州衛人二甲傳臚嚴廷訓寧夏

衛人三甲傳臚章立幟錢唐縣人

馮得孫山人太白詩集六卷大名董復亨元仲刻本

也集中載與費文憲公鶯湖倡和二詩又有約費閣

老先生遊武夷山二絕句云他日移居溪水上衲衣

同拜武夷君觀數詩則山人與文憲交契不薄小說

記載恐非事實特欲重山人聲價耳

浙江巡撫張劬罷調福建巡撫張志棟爲浙江巡撫

宋施宿字武子湖州長城人

全長

紹興間爲左司諫又

爲淮東倉曹言路與有嫌欲劾之無以爲罪宿嘗以

其父所注坡詩鑿板倉司因撫此事坐以贓私右見

西吳里語按坡在湖爲小人所譖與詩案之獄至高

宗朝正蘇黃詩文大顯之日而小人猶能爲祟如此

又在湖州尤奇牧仲中丞近刻此注于吳下因錄緣起于後以備遺事云

十月二十四日

欽差督修河工兵部尚書范承

勳工部尚書王鴻緒等九人回京 陛見

聾音積又音箋按字書人死爲鬼鬼死爲聾李石續博物志二廣之俗門畫虎頭書聾字謂陰司刀鬼名其說小異皆鬼所畏也又音你指物貌內典多用此字乃語助耳

人參類薺芄檜類栢木蘭類桂奚醯類檀蛇牀類靡無見續博物志

燕避戊巳蝠伏庚申道書守庚申之說蓋取諸此漢設戊巳校尉于車師前王庭以制西域諸國則取鎮撫中央之義

博物志太子丹遁到關關門不開丹爲雞鳴於是衆雞悉鳴是雞鳴出關不止一孟嘗矣紀載傳會失實可笑往往如此

以都察院左副都御史梅鋞爲福建巡撫宗人府府丞勵杜訥爲副都御史詹事府少詹事王頊齡爲宗人府府丞

德州城壁塹高深城門內起直城前障掩蔽內外左

右馳道其尾相屬皆顏魯公制也右見王秋澗玉堂嘉話按唐德州今陵縣也

十一月調刑部侍郎喻成龍工部工部侍郎吳涵刑部

偶得宣銅宮盤一中有凸起御製錦堂春詞一闕云  
映日穠花旖旎縈風細柳輕盈遊絲千尺重門靜金  
鳴午烟清戲蝶渾如有意啼鶯還似多情遊人來往  
知多少歌吹散春聲宣德七年正月十五日背刻交  
龍中有內用二字

通鑑紀事本末宋刻大字有尚寶司卿柳莊袁忠徹

家藏印及陸子淵項子京諸印浙江人攜至京師索  
價百二十金留二日而還之

十一月十三日 上親祀南郊

十四日 駕謁 孝陵

御書賜河南巡撫徐潮曰撫四封福建巡撫梅鎔曰

攄誠信

徐以十月賜  
梅以十月賜

以吏部右侍郎韓莢爲禮部尚書仍兼掌翰林院事

禮部尚書王  
澤弘致仕 禮部侍郎掌詹事府徐秉義爲吏部右侍郎

仍兼掌詹事府事

元吳草廬集有毀曹操廟詩序云山南江北道憲司

巡歷至夷陸毀奠牧曹操廟其議自書記申屠駟發  
之然則駟亦快士也唐肅亦有申屠子廸毀曹操廟  
文

十一月廿六日小集卜侍郎令之齋中觀宋江貫道  
山水巨軸題曰山陰會真雪川江參作又王黻孟端  
小幅山水有自題一絕句云溪水涵秋鶴影孤草堂  
雲冷樹模糊相看未遂還山約空復年來寫畫圖又  
王汝玉王達善梁用行俞行之韓奕諸人題詩皆明  
初吳郡名勝也又董思白宗伯臨黃鶴山樵一軸作  
崇山巨壑瀑布曲注而下山氣沉鬱不類文敏他作

自題辛酉三月亥宰

都元敬鐵網珊瑚載逢澤湯允謨云宣和天水雙龍  
印有方圓二樣法書用圓名畫則用方又宣和明昌  
二帝題簽法書用墨名畫則用泥金鑿古者當知之  
湯云見奇石一色青大如鶩彈而形扁上有兜塵  
觀音像如圖畫磨洗愈見又張伯雨家有一劍背有  
字云許旌陽斬蛇第三劍昔有漁者于江頭見雷公  
逐一小黃蛇化爲此劍又唐王建親書宮詞二十首  
極婉麗後有錢武肅王印押又竹龜一以老竹片製  
首尾四足皆他竹外表者竅小兩頭倍大可轉動背



上負三截碑碑一面兩側有轉動亦是外表之竹首  
大腰小不知何故得入或云鬼工也又司馬文正公  
手錄富文忠公使北日鈔一卷字近古拙首尾端謹  
如一

李木菴總憲

柑

說湖廣提督林本直進鸞尾雲霧鳥

二物予詢之卜少司寇令之

永

譽云雲霧鳥出紅毛國

有二種其一五彩相錯如繡其一純白有山水文最  
可愛玩卜為閩撫時從海舶得二枚亦以進上  
鸞尾略如孔雀而其目睛加密翅上皆有之不獨尾  
也又有金錢雞亦與鸞尾孔雀尾相類徧體有目睛

金碧照耀時辰鳥大如雞黑身朱冠喙距皆赤十二  
時按節而鳴惟子午則鳴三通尤為靈慧也

十二月初十日

駕還宮

遣

皇太子祭

孝陵

太皇太后權厝梓

宮以歲暮也

湯允謨云識文夏用鳥跡篆商蟲魚篆周蟲魚大篆  
秦大小篆漢小篆隸書三國隸書晉宋以來皆楷書  
唐用楷隸三代同陰識謂之偃囊其字凹漢以來或  
用陽識其字凸間有凹者或用刀刻如鐫碑凡陽識

決非三代物

鐵網  
珊瑚

又云有士人家藏十二時鐘能應時自鳴按此卽今  
西洋所製自鳴鐘也殊不爲異一紹興士夫家有異  
石峯趾有穴有水應潮自生嘉定間越帥以重價購  
得之

山虛水深萬籟蕭蕭古無人踪惟石嶢嶢右古琴銘  
攬之幽然如水赴谷釋之蕭然如葉脫木右文與可  
琴銘二銘造語之妙不減蘇黃

宋英宗御書固齒及血衄方生地黃細辛白芷皂角  
各一兩去黑皮并子入瓶黃泥封固用炭火五六片  
煨令炭盡入白僵蠶一分甘草二錢并爲細末早晚

予家舊物有十六應真圖董思白題爲支仲元鐵網  
珊瑚云支仲元筆法師顧陸緊細有力每見高宗題  
作晉六朝高古名筆者多仲元作也

又云張敦禮汴人哲宗壻也善畫人物師六朝嘗見  
其陳元達鎖諫圖阮孚蠟屐圖并師顧陸  
又云畢少董畫山水不在米芾之下

卞少司寇云司馬文正公資治通鑑手稿曾見一冊  
皆極端諧爲好事者分去卞得其二三紙耳

頻年已來海內耆舊零落欲盡今歲庚辰四月南海

陳處士元孝

恭尹

卒九月海鹽彭少宰羨門

孫通

卒十一

月予門人崑山盛珍示

符升

卒真有殄瘁之歎

御史彭始搏仍爲翰林檢討檢討劉琰 特改江寧

府知府以其會試分較能守正故也

咸賓錄雲南姚安府產人參

庚辰臘月下浣六日同田綸霞少司徒

雯

吳容大少

司寇

涵

小集卞少司寇令之

譽永

齋中觀畫略記其槩

唐吳道子維摩像殊不清癯而髮披至額如頭陀狀

大乘山北丘志恩題上方云被髮編蒲淨法身手持

經卷現童真法門不二無言說慙愧毘耶彼上人唐

崔徽自寫真題云崔徽病中寫真寄裴使君但不及

卷中人矣此似傅會爲之上有東坡長句字頗佳唐

曹霸人馬又郭熙三松趙大年柳莊觀荷關種

卽袁全

安臥雪大軸畫雪入妙一人覆紺衣僵臥草堂中一

人登柴柵窺之洛陽令却騎徒行雪中一人執蓋其

後寒態可掬餘從者四五人蔽虧林間一一生動真

奇作也高房山山水林木橋道極分明但烟雲似南

宮父子耳自題至治元年七月高克恭周昉孟母斷

機圖趙德齊瑤島會真圖嚴秋月山水黃筌榴花黃

鸝趙松雪山水自題至大二年秋九月十日爲進之

作文徵仲臨松雪秋山訪隱自題嘉靖壬子年八十  
有二唐伯虎良知圖爲吳匏菴摹松雪自署壬午花  
朝詩不甚佳弗及錄圖中二人偶坐林下旁有童子  
及石鼎茗具之屬似是紀朱陸鷺湖之會但題作良  
知殊未雅馴又小幀元方方壺山水道徐賁幼文眠  
雲軒圖楊基孟載記書畫皆佳又有至正丙午秋八  
月渤海高啓字三子皆明初四傑中人也又燕文貴  
山水李昭道東華訪道圖李伯時王母獻桃圖人物  
衣裝皆着色金雷淵題詩并跋淵字希顏渾源人名  
中州集李伯時普賢洗象圖着色如新趙松雪寫

天育驃騎歌上有松雪小篆杜詩延祐四年九月旣  
望趙秋郊飲馬圖皇慶元年十一月有奎章閣學士  
院鑒書博士柯九思跋錢舜舉石勒問道圖太原王  
穉登六跋柯丹丘古木劉堪子輿題云短日虛牕俯  
遠郊高林古木見寒梢春風一去支離久無復丹丘  
綵鳳巢元顧定之竹題晚節兩字贈恭道人明初馬  
治王達二跋鵲鷓圖至正庚子張子政作

祁陽浯溪山谷題中興頌碑後詩刻世謂之小磨厓  
與顏書並重順治初有縣令媚其上官乃磨去一角  
刻其詩過者驚惋予觀歐陽詹弔九江驛碑材文云

美玉抵禽高冠藉足又云與有道而黥無罪而劓投  
四裔魑魅何以別耶石不能言其豈無冤吾反復其  
言而悲之先顏後黃其揆一也欲擬作一篇輒著于  
此

少司寇綏色公言昔使蕪湖道山中有地一區雪甚  
不積居人以畚鍤斲之及丈得土橫亘甚堅其形蜿  
蜒象蛟螭而角鬣未完者急擊碎之云不碎之卽成  
蛟變化去矣崩山汨壤殺人至無算土不含靈乃能  
爲蛟異哉或曰蛟乃雉化雉與蛇交理宜有之又土  
石之怪曰夔罔象土將有怪物憑之耶

少司寇常綬公言康熙三十六年奉使西域經大宛  
國一山云是五百羅漢涅槃之所徧山之石皆如水  
精云羅漢骨所化

常又言寧夏衛城多平屋人行屋上者什六行衢路  
者什四按廣雅屠廡平屋也

西域自土魯番以往兵力皆強勁惟哈密最弱明代  
吐魯番阿黑麻數攻哈密虜忠順玉陝巴金印蓋強  
弱之形自昔而然

宋九域志十卷總三十三路京府四次府十州二百  
四十二軍三十七監四縣一千二百三十五首京府

郡軍名次所隸縣縣隸四京者分畿赤凡二等外郡者分型緊上中中下下凡六等止列地里戶口土貢餘皆不及進表自謂文直事核顧太簡略矣承議郎知制誥丹陽縣開國子賜紫金魚袋王存國史院編修官奉議郎充集賢校理曾肇宣義郎輕車都尉李德芻同撰進蓋本唐十道圖宋九域圖而爲之者康熙戊午奉 旨令翰詹諸臣修皇輿表倣史記年表之例代爲一格橫書之惟詳歷代沿革名號他皆不及與此書互有詳略予時官侍讀分纂山東布政使司六府云

調蕭永藻爲廣西巡撫彭鵬爲廣東巡撫

以太常寺卿李鎧爲通政使司通政使光祿寺卿江  
繁爲太常寺卿

升菴集梁書檄文潛窺鴈鼎疑用戰國策顏率求鼎難事又或用柳下惠岑鼎事則鴈當作贗按古鴈贗字通用升菴深于字學何未考耶

小說載盧杞李林甫仙去固誕妄可笑然近世有遇徐庶者或云在終南或云峨眉成都費經虞有詩云傳聞徐元直尚在南山雲

王敬祖者寶坻諸生年十七失明常虔誦白衣觀音

咒康熙己巳四月二十六日夜夢一婦人素衣澹妝  
手啓敬祖左目以小鉗鉗之出血筋長可寸許復啓  
右目鉗之其血筋亦出而中斷謂之曰爾目無恙矣  
質明視物瞭然惟右目微有所障自是合家持此咒  
不懈益虔盤山拙菴禪師智朴作王敬祖傳咒云南  
無佛南無法南無僧怛然只哆多唵伽茄囉拉伐哆  
伽囉伐哆伽訶呵伐哆囉伽伐哆囉伽伐哆娑訶  
宋末又有朱勔者小較也不屈于元死甚烈

曾子固曾通判吾州愛其山水賦詠最多鮑山鵲山  
華不注山皆有詩而于西湖尤惓惓焉如鵲山亭環

波亭芍藥廳水香亭靜化堂仁風廳凝香齋北渚亭  
歷山堂樂源堂閱武堂下新渠舜泉趵突泉金絲泉  
北池郡樓郡齋皆有作及遷知襄州尤不能忘情離  
齊州後云千里相隨是明月水西亭上一般明又文  
犀剌剌穿林筍翠靨田田出水荷正是西湖消暑日  
却將離恨寄烟波將家須向習池遊難忘西湖十頃  
秋從此七橋明湖上有七橋風與月夢魂長到木蘭舟荷氣夜  
涼生枕蓆水聲秋醉入簾幃一帆千里空回首寂寞  
船牕祇自知西湖一曲舞霓裳勸客花前白玉觴誰  
對七橋今夜月有情千里莫相忘按明湖一名濯纓

一名蓮子今俗稱北湖而子固謂之西湖以在城中  
西北隅也當從之曾文有齊州北水門齊州二堂兩  
記

蘇子由官齊州亦有西湖諸詩環波亭云過盡綠荷  
橋斷處忽逢朱檻水中央又北渚亭鵲山亭檻泉亭

疑此卽  
趵突泉

和李誠之燕別西湖西湖觀捕魚食雞頭踏藕

凡八九篇後又寄濟南守李公擇云岱陰皆平田濟  
南附山麓山窮水泉見發越遍溪谷下田滿稷稻秋  
成比禾菽池塘浸餘潤菱芡亦云足又云不知西城  
下滉漾千畝綠仰見鷗鷺翻俯視龜魚浴其于吾州

亦不薄矣蘇文有樂原石橋閔子祠堂二記

李退菴侍郎

敬

竹鎮記略云白龍王廟民賓某見一

媪持古鏡以斗米易之令鏡工磨治初磨見已像是  
牛再照乃是丐者三照始復本形怪而益磨之後竟  
無他

又云鎮人熊申有一石如指大形扁光瑩如瓊瑤中  
有兔銜靈芝轉側照之皆具體

特命翰林院侍讀汪灝提督山西學政初以翰林官  
出視學政惟直隸爲然康熙二十一年以浙江人文  
之藪亦用翰林他省仍舊其改用翰林則自此始

山西  
學道



僉事于漢  
翔休致

竹鎮有人病溺不下求于乩仙判云牛膝車前子三錢共五錢同剉爲麤末將來白水煎空心服之果愈天啓辛酉秋六合巴山菴新造地藏忽左膝生花二朶三日如盃七日如盤高可盈尺色淺黃嫩白清芬襲人又云右脇下生蓮華一莖四十餘瓣如栗玉色逾月又生一莖縣人孫國救記其事

宋文憲燕書有玉斝生與三烏叢臣約異時立朝勢人之門足勿涉也云時趙宣子得君諸大夫日奔走其庭三烏叢臣雞初鳴卽去候宣子入門見有危坐

東榮者舉火照之則玉斝生也各慙而退近有大臣出入權門者五更往候于廡下見有偃卧者迫視之亦某大臣也與玉斝生之事正同

漢玉錢一枚題云王府布刀有趙松雪鐫蓋及贊蓋已損壞惟贊存末云延祐二年仲春良日翰林院集賢直學士趙孟頫贊門人狄庶常億得之吳中好事家

居易錄卷三十三終

居易錄卷三十四

濟南 王士禛 著

曾子固以熙寧五年守濟南其後二十一年晁無咎  
繼來爲守作北渚亭賦最著有別歷下二絕句云來  
見芙蓉溢渚香歸途未變柳梢黃殷勤酌突溪中水  
相送扁舟向汶陽鴛央瀉瀉遠漁梁搖漾山光與水  
光不管使君征棹遠依然飛下舊池塘又將行陪貳  
車觀燈云行歌紅粉滿城歡猶作常時五馬看忽憶  
使君身是客一時揮淚逐金鞍又赴齊州詩云淮南  
蒙召鬢毛斑乞得東秦慰病顏曉整輕鞍汶陽北却

衝微雨看青山吾州于宋得子固子由無咎三公而  
東坡公過此亦有濟南春好雪初晴行到龍山馬足  
輕之咏足敵唐北海子美太白三公矣

召原任刑部員外郎趙申喬 陛見特擢浙江布政  
使司布政使與劉琰皆以直隸巡撫李光地之薦也  
吾邑工部尚書畢公亨字嘉會成化進士歷仕弘正  
朝爲名臣國史有傳求其遺集不可得矣偶于釣臺  
集見其五言一首錄之詩云氣節扶炎祚綸竿豈釣  
名人心終不死廟貌儼如生木落長江迴山高獨樹  
平灘頭明月在照見古今情公之子山西巡撫昭號

蒙齋有句云行過竹裏如塵外望入荷邊似鏡中集  
亦不傳于世

昔人題趙松雪畫蘭絕句云滋蘭九畹誠多種不及  
墨池三兩花今日國香零落盡王孫芳草遍天涯吾

鄉劉孔和字節之青岳相國鴻訓子也有題松雪畫宮

女啜茗圖詩云厓山遺恨捲黃沙彩筆王孫弗憶家  
忍向卷中摹舊事直須羞煞後庭花

予童子時夢一丈夫屬對出句云君子有酒旨且多  
予應聲曰詩人之賦麗以則

甘肅間民名字率多四字如馬毛向上之類見于法

司招詳甚可駭笑近見黔省一役卒名沙臥赤雞亦奇

曾子固隆平集景德二年以齊州章丘縣爲清平軍以洺州高苑縣爲宣化軍洺字當是淄字之譌

開寶四年改密州輔唐縣曰安丘蜀州唐興縣曰江源壽州盛唐縣曰六安廣南恩唐州曰恩州當是去唐未遠人心思唐故改之耶

隆平集敘宰執云僕射侍中皆秦官僕役于射謂之僕射侍中則丞相之史耳抗之以爲宰相名同而實異甚矣

隆平集樞密列傳云姜遵字從式淄州人咸平二年登進士第累擢諫議大夫天聖六年樞密副使八年薨于位贈吏部侍郎子延齡餘慶初遵爲御史言青州大姓麻士瑤不法事詔按實誅之爲吏尚嚴知永興軍太后詔營浮圖遵毀漢唐以來碑碣代磚甃躬督成之因獲進用按遵吾鄉長山人宋隸淄州遵能識范希文于微時而本末無足取如此

胡元瑞應麟作丹鉛新錄菟林學山以駁升菴之誤然其所記誤者正復不少如二酉綴遺所載百疊漪漪水皺六言又步武所臨雲蒸霞起四言乃東坡夢

中所作紅靴銘及太真妃裙帶詞而胡不知何云博洽耶

史記佔樛一條云醫家二扁鵲一黃帝時人一戰國時人二雷公一黃帝時人一趙宋時人戰國秦越人明洞醫道世以其與黃帝時扁鵲類因以為號今所傳難經乃秦越人作非扁鵲也宋雷斅撰炮炙三卷人多不知其名因素問有雷公為黃帝弟子遂以炮炙為雷公撰非也隋志有雷公注神農本草四卷漢志有泰始黃帝扁鵲俞拊方三十卷皆假託耳考古者不可不知

今謂官員給假為請急晉令急假者五日一急二歲以六十日為限車武子早急出請子敬盡急而還又謂之取急詳山谷杜詩箋

吾友彭少宰羨門

孫適

以康熙丁丑假歸己卯九月率

子姓姪甥輩登秦駐山賦詩云平生幾量中郎屐更不登臨奈老何明年庚辰重九後遂下世殆識也

題跋古人書畫須論人品品格高足為書畫增重否則適足為辱耳葉石林詩話載王摩詰江干初雪圖末有元豐間王珪蔡確韓縝章惇安惇李清臣等七人題詩詩非無佳語但諸人名字千古而下見之欲

唾此圖之辱爲何如哉余少嘗語汪鈍翁云吾輩立  
品須爲他日詩文畱地步正此意也每觀鈐山集亦  
作此歎

蘇州滄浪亭本吳越廣陵王元璪南園以蘇子美之  
故遂名吳中不知此園後歸章惇大觀末又賜蔡京  
京詩八年帷幄竟何爲更賜南園寵退師是也二人  
爲南園之辱甚矣前乎子美則王之宰長洲日攜  
賓客飲于此有詩云他年我若功成後乞取南園作  
醉鄉雖託空言要足爲滄浪增重也南渡後歸韓蘄  
王庶幾一前章蔡之恥

祁陽民張志高妻申氏夫亾守貞日誦經蔬食一日  
清明忽雷電晝晦佛龕中有紅光少頃開霽龕前垂  
一物一蒂三縷長三尺博一寸光澤溫潤如水桐狀  
有道士見之曰此天上柳旛所以旌善人也懸之四  
十年宛然如新

范蠡語兒亭事前辯其妄按越絕內經九術越飾美  
女西施鄭旦使大夫種獻之于吳則又非少伯事矣  
紀載之不足信如此越絕記地又云勾踐夫人產女  
于此亭後破吳更名女陽更就李爲語兒鄉

左傳伍員與申包胥友其亾也謂申包胥曰我必覆

楚國申包胥曰勉之子能覆之我必能興之史記文亦同吳越春秋皆稱員曰伍子胥獨國語以吳嘗封子胥于申稱為申胥越絕則云越為策楯獻之于吳申胥諫云越飾西施鄭旦獻之于吳申胥又諫云吳王不聽以申胥為不忠而殺之以伍胥為申胥混淆不辨甚矣越絕之外也劉蛻有諭江陵父老文謂楚人不當祀子胥今杭州臨平有申包胥廟或謂申楚臣不應祀吳不知皆沿越絕國語之文而致此淆譌耳蓋江陵之祠乃申包胥臨平之祠乃伍胥耳當兩正之

二月初七日雪中門人孫戶部貞伯端攜書畫相示揭鉢圖白描一卷後署元豐二年八月既望龍眠居士寫又一冊凡四馬甚秀異與世所傳韓幹畫馬多肉者迥殊一元祐元年四月初三日左騏闕十八歲四尺六寸一元祐元年十二月十六日左騏闕一牧于闕國進到鳳頭驄八歲五尺六寸一元祐二年十二月廿二日於闕一駟監棟中秦馬好頭赤九歲四尺六寸一元祐三年閏月十九日溫溪心進到照夜白四尺五寸又宋元人花卉一冊有許文簡公松皐印記蓋靈寶許氏故物也又崔子忠畫倪元鎮洗桐圖絕

類仇英筆子忠字道母一字青蚓萊陽人居京師  
山谷居黔有題蟻蝶圖六言云胡蝶雙飛得意偶然  
畢命網羅羣蟻爭收墜翼策勳歸去南柯後又遷宜  
此圖傳于京師蔡京見之大怒將以怨望重其貶會  
山谷卒乃免小人之禍君子其毒乃至于此宋以忠  
厚開國然文字之禍亦他代之所無而于坡谷尤甚  
矣

禮部尚書署理川陝總督席爾達疏咱里土千戶古  
六七係明時世襲當化林營叅將李麟等渡瀘而西  
首賚明頒萬戶府印一顆烏思藏招討司印一顆都

綱印一顆誥一道迎繳道左臣查古六七邊徼土裔  
因咱哩地界爐蠻肘腋之下藏匿印誥混跡土民蓋  
已有年今于天朝官兵渡河之初首見賚迎忱悃  
可嘉應否准其世襲云兵部覆疏所繳洪武六年所  
給萬戶府印招討司印正統十一年所給都綱印洪  
武十八年所給誥開授宣武將軍朶甘宣慰司副使  
都元帥互異不符及土司所轄係何地方應行令該  
督確查明白具題再行給與印信號紙可也奉  
俞旨

山谷與摩詰貌相似其自贊云元豐間求李伯時作



右丞像此時與伯時未相識而作摩詰偶似不肖但  
多髯耳今觀秦少章所蓄畫像甚類而瘦豈山澤之  
儒故應臞哉又云登山臨水喜見清揚豈不優孟爲  
孫叔敖虎賁似蔡中郎者耶今觀二公詩格不相類  
而脫盡世諦則一形貌固宜相肖乃神似非形似也  
嚴怡字石谿如臯人嘉靖間以明經爲堂邑王府教  
授與邊仲子南洲習以詩相倡和予嘗錄其三篇附  
刻仲子集後門人許宮允山濤嗣云怡家貧行誼亢  
潔嘗館于富室歲暮將歸主人設筵祖道以優伶侑  
觴酒闌主人出兼金爲壽且云先生試一權之怡大

怒曰君乃以我爲商賈乎立散之諸伶拂袖而歸不  
持一錢

桐江百詠載白水湖在桐廬縣北二十里上下有四  
湖云相傳光武帝微時避莽亂訪嚴光高獲于此故  
因白水真人得名閱之不禁噴飯無論光武家南陽  
卽令避亂不應至此初齊國上言有一男子披羊裘  
釣澤中帝疑其光三聘始至不屈乃遁之富春安得  
先隱桐廬而帝反遠就子陵耶

沈存中云慶曆中有畢昇爲活字板用膠泥燒成今  
用木刻字銅板合之

余鄉孫文定公廷銓云司馬公資治通鑑如書家之有  
歐顏無處無鋒荀悅袁宏兩漢紀如鍾司徒書時具  
意外十二種筆意

唐開元中宰相共食實封三百戶謂之堂封及元載  
爲相又日賜御饌可食十人遂爲故事其後乃至兩  
省每歲符江淮大賈使主堂廚食利因是挾貲行天  
下所至州鎮爲右客富人倚以自高李文饒始一切  
罷之以一堂餐之微至遠取大賈主之又使商賈因  
以爲利政體謂何贊皇固賢他人豈盡不知廉恥者  
乎而裴中立李深之輩亦安之何耶

隋末割據諸姦雄皆羣盜獨夏王竇建德有帝王之  
度觀其舉措不在太宗之下楊廉夫樂府云觀建德  
行事不忍以劇賊目之在鄉里時解所耕牛與貧無  
以爲喪者起兵日滑州刺史王軌爲奴所殺以首來  
建德曰殺主大逆也內之敗教遂誅奴反軌首此舉  
暗合聖經不納三叛以懲不義之旨光武有慙德矣  
推是心也豈不可以有天下云云論甚嚴正予又謂夏  
王之義尤在斬宇文化及等爲煬帝素服發喪唐納  
宇文士及以爲上儀同視夏王何如秦王俘建德世  
充于京師宜誅世充而赦建德顧乃斬建德于市赦

世充爲庶人徙蜀未行獨孤修德殺之猶免修德官  
此何說耶胡致堂謂宜數世充之罪而戮之而以宥  
世充者宥建德則刑有章矣諒哉然致堂又議建德  
不當哭煬帝謁蕭后以爲異乎漢高之于義帝則腐  
儒之謬論耳

趙子昂同知濟南亦有詩唯趵突泉詩最著餘數篇  
人罕述之如初到濟南云自笑平生少宦情龍鍾四  
十二專城青山歷歷空懷古流水泠泠盡著名官府  
簿書何日了田園歸計有時成道逢黃髮驚相問只  
恐斯人是伏生勝概樓云樓下寒泉雪浪驚樓前山

色翠屏橫登臨何必須吾土嘯傲聊因得此生簾外  
白雲來託宿梁間紫燕語關情濟南勝槩天下少試  
倚闌干眼自明懷宋齊彥學士田師孟省郎云乍可  
望塵迎使者何堪據案筆疲民濟南雖有如澠酒準  
議愁中過一春東城云野店桃花紅粉姿陌頭楊柳  
綠烟絲不因送客東城去過却春光總不知湖上莫  
歸云春陰柳絮不能飛雨足蒲芽綠更肥正恐前呵  
驚白鷺獨騎款段遶湖歸春日漫興云春事匆匆轉  
眼過滿城流水綠陰多西園總有紅千葉塵土埋頭  
奈爾何又送山東廉訪照磨于思容

名欽著  
齊乘者

林生春動

紫煙生策馬東風十里程若到濟南行樂處城西泉  
土最關情

元遺山濟南賦咏尤多而工如濟南山水天下無鵝  
山寒食泰和年等句古今膾炙具載遺山集

超擢翰林院侍讀學士許汝霖爲工部右侍郎  
右侍郎  
顧藻給

假  
超擢提督江南學政太僕寺少卿張泰交爲大理寺

卿大理寺卿常  
翼聖休致

駕駐柳岔口以霸州文安大城連年水患  
諭免

四十年及節年逋欠地丁錢糧

廣東總督石琳等疏報招出瓊州黎人王仕義等既  
又招出黎首王鎮邦就撫黎峒悉平

四川提督總兵官唐希順疏報恢取打箭爐等事康

熙三十九年十二月二十日官兵分三路進攻宰牛

一路遣遊擊張自成等首攻哪叱頂琪一路遣中軍

馬爾植等直攻大岡惟咱威一路喋吧昌側集烈蠻

兵五千餘人在磨西面臣親帥官兵直攻發新路之

兵先進至濫琪子殺蠻兵四百餘至哪叱殺五百餘

共獲一千餘級臣馳至咱威攻二道木岡磨殺三百

餘至磨西面密從間道而上蠻兵潰逃奪營盤十四

座獲千餘級張自成從宰牛填截殺而來又追殺一千五百餘級十二日遊擊張斌獻首級一顆稱係喋吧昌側集烈公驗是實又據叅將馬爾植攻取大岡蠻兵憑高據險官兵奮勇勦殺一千二百餘級龍道被鎗打死呈獻首級云又疏報臣于本年正月十三日抵打箭爐有各省客民千餘及喇嘛番民等歡呼跪迎聲聞數里又有木鴉頭人錯王端柱通事托和塔等首先歸順繳舊鈔印其木鴉熟庫高僧喇嘛并木鴉窪爲日及魯密日龍阿打喇吧各處喇嘛頭人投誠絡繹不絕其現來歸附者一萬二千餘戶皆宣

諭 皇上德威給賞銀牌緞疋鞍馬告示令各安業訖奉 旨下部議敘

雙槐歲抄宣德癸丑冬命吏部選在外庶官有文學者六十八人令內閣試諸廷擇知縣孔友諒進士廖莊等七人改庶吉士歷事六科是時合三科進士選二十八人與修撰馬愉編修林文評事張益同進學文淵閣庶吉士分翰林六科兩等惟是七年爲然

明刑部員外郎邵經邦字弘齋著弘藝錄載潑水驛與巴鈍齋憲使宴詩云婺女星前瞻使節斗牛槎底汎行舟張騫自覓河源去徐福從招海外遊綺席玉

杯光照夜繡衣霜簡氣橫秋來朝共擬尋天姥白鶴  
翛翛下九州鈍齋諱思明吾邑人由給事中外遷監  
司子孫式微其生平亦無可考僅存城中一坊耳故  
錄此詩

本草云人參爲藥切要與甘草同功而易蛙惟納器  
中密封可經年不壞高麗作人參贊云三楹五葉背  
陽向陰欲來求我音樹相尋音椒葉似桐人參多生  
其下

超擢兩浙鹽運司運使李濤爲廣西布政使  
大學士熊賜履上疏乞休奉 旨卿才品優長宜

力有年簡任機務勤慎益著文學優贍倚任方殷不  
必以衰病求罷

董斯張字遐周湖州人號博雅所著吹景集一條云  
佛典中本師二字見史記樂毅傳祖師見漢書丁姬  
傳居士見禮記及韓非子魏志管寧傳侍者見國語  
及漢書眷屬見史記樊噲傳本作媿長老見漢書宰官

見郭象莊子注某甲見周禮鄭玄注及應劭漢官儀  
布施見國語供養見嵇中散集煩惱見河上公老子  
注幢字見方言西京東都二賦薊字見釋名右援據  
可謂詳博當是內典偶合耶抑襲取耶

吹景集又載唐人詩用字異音有子池北偶談中廣  
李子田丹浦窾言所未及者補錄數則于此韓退之  
岳陽樓詩軒然大波起宇宙隘而防防音訪東都詩  
新輩只嘲評評音病元微之東南行徵俸封魚租封  
音奉痞臥詩一生長苦節三省詎行怪怪音垂嶺南  
詩洞照失明鑿鑿平聲夜池詩高屋無人風張幕張  
音漲又苦思正旦酬白雪旦音丹又雁思欲回賓自  
注思上聲白樂天仁風扇道路陰雨膏閭閻扇平聲  
膏去聲李義山石城詩簟冰將飄枕自注冰去聲陸  
魯望海客施明珠湘糲料淨食自注料平聲

施宿武子又嘗參諸家本訂以石鼓籀文刻于淮東  
倉司辯證詳備見宋章樵石鼓文釋吹景集引之以  
爲奧衍奇博可與鄭漁仲爭衡亦一博雅好古君子  
也

明嘉靖中妖人李福達亾命吳中匿常州楊七郎家  
酒間輒喚屏風上美人下地歌舞獨畱一人守屏郡  
倉後有潭深不可測有蛟爲祟人不敢行太守荆某  
請福達捕之李約太守同往作符令守左右變童持  
以入水頃之童子手握蛟出水上矣蛟甚巨李咒之  
僅可五尺許乃禹步殺蛟付廚作鮓自是怪絕又客

華亭朱尚書家一日告別云將往京師且求二綱紀  
送之既抵燕令僕南歸歸之明日尚書方登臺飲酒  
李忽從天而下復畱經年而去

陶真人妻某氏奇醜多智術好居間公卿皆畏之及  
陶辭歸江西下潞河美女子貂冠從者三百人輜重  
不可訾計陶歸未幾亾去令爲疑冢百餘以病死聞  
明初大臣子孫恩廕多出常格之外如劉基子璟廕  
閣門使胡廣子種廕翰林簡討劉儁子承裕以父死  
事安南廕給事中

廬陵張文龍萬曆中爲長山令建陳仲子祠于其墓

側春秋祭焉謂仲子廉士以歲時 文廟祭享畢徹  
所獻孔子太羹一盂佐以李栗拜祠下釋奠至今行  
之

長山城南樓鐘懸數十年扣之無聲文龍誅以文卜  
遷之文曰惟神職司宣布功懋晨昏本秉氣于西清  
詎受制于南燄致兩位不相得而聲氣難求使萬民  
失所瞻而聾聵弗啓爰茲改卜期爾發靈謝彼離異  
之鄉奠厥庚辛之宅大扣大鳴起聲聞于天下曰宣  
曰暢快久鬱之人心爲爾銘功鑒于申祝遂遷之城  
西自是果鳴右二事見鄭仲夔雋區吾邑本長山地



以關鄉里故實錄之

天啓丙寅湖州雙林鎮人獲巨蚌剖之中有珍珠八  
仙及壽星像又一人得二蚌將及岸其一落水覓之  
不可得其一剖視有珍珠象碁子十六枚

蛤蚧出蜀中雌雄相抱婦人臨葶握掌中兒卽易下  
弋陽汪少宰偉赴一中官請設飯止半甌而香滑迥  
異他米問所從出曰四川以歲例進上者其米生於  
鷓鴣尾尾止二粒取出放去來歲更取之

粵東有老人業屨坐旁恒置一大石一日有賈胡見  
之求厚直售焉不許因藏其石閱數月賈胡復至請

出而視之但呼可惜其人問故答曰石中有異馬無  
價之寶也以翁日對之業屨有草以爲養故得活今  
餒死其中矣翁疑而剖之果然

處州劉一介少年棄家入括蒼山中緣竹徑而入百  
二十里綠陰無間遂隱于此榜所居曰綠天深處五  
里一亭十里一室不入城市者六十年太守任冲華  
往造之三日始得見

明時大內溷廁所用乃四川貢野蠶所吐成繭織以  
爲帛大僅如紙孝宗時一宮人取已用棄擲者澣濯  
縫紉爲簾帷之屬上見而問之具以對上云暴殄可

惜命停進貢踰年川中奏詔書到後野蠶不復吐繭  
村民衣食仰此者流離失所乃令進貢如初自後蠶  
亦復生此事謝在杭五雜俎載之

白居易詩嫁得黔婁作夫婿可能還寄蜀茶來謂蜀  
產如蒙頂茶之類也然聞有蜀茶一種樹似山茶高  
者丈餘花開以二三月大如牡丹色皆正紅但香稍  
不逮耳

南唐徐常侍鉉言常得李超墨一挺長不過尺細才  
如筋與弟錯共用之日書約五千字十年乃盡超與  
常侍同時其珍重已如此宜北宋諸公得其殘圭斷

璧以爲希有也

予嘗愛宋人吳縣主簿寇國寶詩黃葉西陂水漫流

籬條風急滯扁舟

云

後考之陳無已集始知爲彭城

人及后山之門讀羅端良願新安志言彭門寇鈞國  
家藏李廷珪下至潘谷十三人製墨東坡先生臨郡  
日取試之因爲書杜詩十三篇各于詩下書墨工姓  
名而品次之蓋亦國寶兄弟行嗜古而好事者也

隋大業初命竇威等撰區宇圖志五百餘卷又命虞  
世基等撰十郡志一千二百卷其圖序字極細並歐  
陽肅書肅詢之長子通之兄也見學圃薈蘇

楊國忠與太真妃爲再從兄妹然妃本廣西容縣人  
生父名維都部署楊康求爲女時楊玄琰爲長史又  
從康乞爲女雖同姓而父已三易矣其于釗及韓統  
秦三夫人之屬皆假兄弟耳

張藐姑太宰慎言字金銘陽城人萬曆庚戌進士天  
啓中以忤魏闖遣戍甘肅嘗有寄友人書云僕至酒  
泉卽寓禪室新正僦得一宅傍有園可引水種果蔬  
僅借得史記一部求漢書了不可得若馬角未生當  
以次讀尚書禮記去留都未可知亦漸有此中樂不  
思蜀之意百年強半之人雖罹網罟然此中無恨何

所不可擬元夕後約地主以小隊馳關外臂鷹牽犬  
獵得黃羊野馬割以佩刀炙用野火生嚼流血亦大  
快事茗酪最佳羌婦醜結日獻酥潼以餅餌報之僕  
嗜此殊勝步兵美醞耳此書不惟見先生行乎患難  
之學亦大有典午人風味又嘗錄煎酪法寄同年錢  
公牧齋云

藐姑又云寡言之味饒于多無言之味長于寡

藐姑精禪理嘗云首楞一經密因了義性相二宗居  
然略備安得如昔者亾友鍾伯敬之筆精以首楞爲  
經以雜華維摩金剛般若等爲緯會性相融經論妙

宗教破名相盡斬葛藤使學人冰消霧釋也後來會有人恨吾不及親見之耳

又寄子履旋家書云刻下父母俱存大小無恙光景已佳但日中則昃可奈何每念及此通身汗下目下只當求一安身立命之處勢燄時如此淒涼時亦只如此任四時寒燠溫涼而一元之氣寂然自在爾父子當思吾言此書字字藥石可與伏波富不可使復貧貴不可使復賤之語參看

研北雜志云張曲江一名博物見徐浩碑

三月初一日辰刻 經筵講官東閣大學士吏部尚

書熊賜履刑部右侍郎常綬進講中庸至誠無息三句文華殿大學士禮部尚書張英掌翰林院內閣學士法良進講易繫辭擬之而後言三句講畢 賜宴

太和門

初三日辰時

東宮會講工部右侍郎許汝霖詹

事來道進講孟子堯舜之道孝弟而已矣二句少詹事常壽修撰胡任輿進講易咸卦君子以虛受人講畢 賜茶文華殿門

鄭端簡

曉

吾學編餘云自成化弘治已來翰林專用

庶吉士他官不得改在翰林者不必盡得其人誠一

弊政國初宋文憲王忠文宋文敏朱備萬之後梁用之以陽春令爲修撰金文簡王希範以給事中黃文簡以中書舍人胡若思以桐城令爲簡討楊文貞以審理副爲編修劉忠愍以主事爲侍講李文達以郎中爲□□云自時厥後惟萬曆庚戌不選庶吉士崇禎中考選推知等官以翰林科道兼用如劉正宗薛所蘊黃文煥張縉彥皆以推知入翰林 本朝選庶常不考試惟引 見定于頃刻其由他衙門改入者則順治初王文貞崇簡岳映斗魏天賞等以癸未前進士改庶吉士後則康熙中杜鎮以中書舍人改編

修同時李昌垣郭芬以兩淮運副大理寺副皆以翰林謫官召還及戊午則予以戶部郎中奉 旨特改侍講明年己未徵聘諸人 御試體仁閣賦一

篇五言長律一首取彭孫適等五十人皆入翰林其監司郎中改侍讀侍講進士及舉貢已官者爲編修未官者及監生生員布衣皆簡討入館纂修明史後至三品以上大僚惟湯斌潛菴工部尚書彭孫適羨門吏部侍郎陸萊義山徐嘉炎勝力內閣學士兼禮部侍郎王頊齡瑁湖宗人府府丞李鎧公凱通政使司通政使 內廷供奉改翰林二人高士奇江村至

詹事府詹事勵杜訥近公今爲都察院副都御史  
韓退之詩多倒用成字蓋本諸三百篇孫季昭示兒  
編所拈如中林中谷中河中路中田家室裳衣衡從  
稷黍瑟琴鼓鐘斯蝻下上羊牛甥舅孫子女士京周  
家邦彙鼎息偃之類不一而足

孔氏大宗在衢州別派居句容儀封而楊循吉廬陽  
客記云一在舒城一在英山又云程頤子孫在英山  
蘇軾子孫在六安不知何據宋葉紹翁三朝聞見錄  
紹興元年褒錄程頤子孫觀之源二人居池州

姑孰之龍山相傳爲孟嘉落帽處山有帽痕入石類

劊刻者新野馬仲良

駿之

遊之也一日往在吳中遊靈巖

西施洞前屨迹深寸許嬌趺一幘皆得比于藍田射  
虎之矢可絕倒也同遊爲之大笑

刻書始于五代昔人率以爲然予按司空表聖一鳴

集有爲東都敬愛寺募雕刻律疏印本疏云自洛城

□□乃焚印本漸虞散失欲更雕鏤

云

則唐已刻書

此其昭昭可據者顧前無引之者何也

南宋陳止齋

傳

與晦菴同時嘗謂晦菴以千七百年

之形管與三代之學校以爲淫奔之具偷期之所竊  
有未安朱知之移書求其詩說答云某未嘗注詩所

以說詩者不過與門人爲學士講義今皆毀棄之矣  
見三朝聞見錄蓋不欲口舌爭也

部院翰詹諸臣恭進 恩賜 御書墨刻若干卷

廣西巡撫彭鵬疏請廣西武舉取三十名于壬午科

舉行得 旨俞允

廣西以武生人數不足每科俱停止故也

巡視西城監察御史張瑗疏請毀明逆福魏忠賢西

山墓及華表碑碣得 旨該城御史卽督令小

毀輿論快之

改原任禮科都給事中王原祁爲額外左春坊中允

辛巳春三月 經筵事畢士禛卽病且劇伏枕四十

餘日悉部務廢閣具疏乞假奉 溫旨卿才品優

長簡任司寇正資料理覽表以遷葬援例請假准給

假五月事竣速來供職不必開缺該部知道且有老

成忠厚人品學問俱好之褒伏念士禛自入仕版敷

歷中外四十二年矣年踰六十筋力漸衰宿疴時作

不敢輒以私請顧又邀 異數如此迥非恒格古

云陳力就列不能者止自顧衰殘益滋惶懼因識卷

末以示子孫勿忘 國恩勿替家訓云爾

右居易錄三十四卷于康熙己巳冬杪重入都門

隨所聞見而雜記之歲有紀錄合前所著池北偶

居安錄卷三十四  
談二十六卷通六十卷辛巳四月三十四卷既成  
而予隨上疏請告詎非數之前定耶士禎記

居易錄卷三十四終



